

北
行
日
譜
楊公政績紀附楊公本傳





北 行 日 譜

朱 祖 文 撰

叢書集成初編

(補印本)

北行日譜及其他一種

一九三七年六月初版

一九五九年十月補印

商務印書館出版

上海大眾文化印刷廠印刷

北行日譜序

自古忠臣義士烈烈而死。令人追攀。千百世之下。欲彷彿其咳唾涯略而不得。則有意爲摹而響爲附者。所傳聞異詞。所徵述異狀。而疑信參焉。于是門弟子及私淑之徒。有年譜之作。閒繫以月以日。而考信者始有所憑而不眩。若夫天地晦冥。狂飆駭電。瞬息百態。年月有所不及。詳而身其事者。按日而譜之。則若北行日譜是已。日譜者何。完天朱先生之書也。日譜而繫之北行者何。因周吏部行也。吏部爲天啓名臣第一人。凡緣吏部受險艱者。例得大書特書。不一書。相率牽連以書。而況身其事者之自爲書乎。余三復而悲之。書之面與吏部往復者十三。與吏部往復于寸楮九帛。飛出棘端狂吻之際者十二。去來幾輔間。與吏部心知默爲拮据相往還者十之五。大抵與吏部語。皆蕭疎慷慨。如在鼎鑊百沸中。而翛然噓之以清風者也。與吏部諸相知語。沈冥慘淡。如藪逋匿亡。曲爲求全之路。不敢大聲疾呼爲德。而類之耳鳴者也。至于寸楮九帛之傳。在吏部則爲狄公去絮之衣。在家人則爲蘇公誤進之炙。如新鬼薦羹。巫史紛若。幾幾于盼壘之一線。而或咻之或忱之者也。嗟乎。言至此。而朱先生周旋之情事。尙忍言哉。宋文信公前後指南錄。備述時日。且各系之以詩。我朝楊忠愍公。亦于獄中作年譜。鬢眉俛仰。至今炳煇如見。然主方虛相位以待。而嘉靖中葉。柄臣祗偷于驪龍之睡。以弄其太阿。兩公得閒而自爲書也。固宜。迺逆闖熾燄。時何如也。以逆闖之熾燄。猝發于天下第一人。而開讀激變。死傷狼藉。其棄疾于吳人。與訶吳人之周旋。

于吏部者。將何所不至。朱先生既身其事。而又能于倥傯中。按時日而譜之。使千百世之下。不苦于親炙私淑之無人。及它傳聞異詞。徵信異狀者。猶得有所折衷焉。朱先生之爲吏部。可稱死交矣。先生之死。蓋得于憂與勞。幸獲首丘。而終牖下。然及離照之升。而不及霆威之震。先生實齋恨以死也。身爲世爵。又爲名諸生。而家故酷貧。沒而棺斂鋪糜。皆藉同人取給。卽是刻亦余輩釀金爲之。生平多斲行不書。書其爲吏部者。崇禎己巳秋。泌園人張世偉頓首撰。

北行日譜序

北行日譜。朱完天先生爲周吏部北行時譜也。余讀而感愴恫乎。其有餘悲焉。曰。嗟乎禍患之際。豈不難言之哉。方是時賊璫饑實張甚。所以密布耳目。而訶人動息者。前後數百輩而未已也。於是諸凡與吏部周旋者。咸或避匿。弗敢以名迹見矣。羣情洶洶。恫疑日甚。吏部且莫且北。而欲爲捍牧圉。職橐籥者。環視而或難其人也。一二同人輩。樂爲吏部死。非不人百其身。顧其勢又各有所牽阻。獨先生一人。能脫然奮身。負羈縲以相從于孤危迫阨之中。而無所難焉。斯其事。卽於吏部非有分毫關損益。而吾黨友朋之誼。不深嘉賴之哉。且先生與吏部初亦非深相識。獨以母夫人旌節一事。感吏部之相成。故遂委心許以驅馳。夫世人修小意氣。搶攘感慨之中。輒相然信以死。間亦有之。而要其所爲。結心矢報。大都不出聲名利祿。相煦相沫之間耳。而先生之所爲。致感于吏部。而幾幾乎必欲得一當者。顧獨在此。此又何也。先生始北歸。爲我道吏部死事。而獨搯扼於不獲含斂。以爲深憾。嗟乎。此于先生奚憾也。先生是時方有吳橋之役。安能復與其後事相及哉。且先生固早知吏部不免。然亦庸詎知其倉卒至此。不復少須臾也。此于先生奚憾也。先生歸未幾。而以先時在道勞瘁。疾遂不起。先生真以死報吏部矣。此于先生亦奚憾也。余猶記吏部別去時。余復寄聲謂恨不能髡鉗從行。使田叔孟舒輩獨有千古。以爲心中一大欠事。嗟乎。若先生者。其高誼豈復出田叔孟舒諸人下哉。而余心中欠事。亦若藉以少補萬分一。此余所以讀譜而重有

感也。而因爲之論著若此。至于譜之所以作。與譜之不可不作。先生自有序。嗣長公有序。吾友異度有序。序詳矣。余不復及云。時崇禎己巳秋日。朱陞宣稽首撰。

小引

日譜者何。譜北行也。北行奚爲而譜。蓋斯行也。實爲蓼洲先生。先生被逮。從容慷慨之氣象。宜譜。不意細民無知。以哀控而至憤激。其間斟之酌之。不爲自裁。而爲赴闕。甘心鼎鑊之氣節。宜譜。吾蘇諸君子之遊於京者。爭爲先生効一臂。一種之肝膽。宜譜。北方諸君子急先生之難。慮無不殫之力。千秋之意氣。宜譜。未也。與先生未識一面者。靡勝乘轅之好。或爲謁蹶釀金。或爲捐軀趨事。以庶幾先生之一生。不宜譜乎。與先生爲金石交者。旣爲妄覲其生。復爲深痛其死。思爲先生孤寡永遠計。不宜譜乎。未也。先生之僕。匍匐赤日。往來如織。更有隻身孤旅。拮据含殮。以結先生此身之局者。自有斯譜。而其忠不泯。卽諸君子之僕。憔悴征途。至有緣是骨立者。自有斯譜。而其勞不泯。不寧惟是。譜及彼地之芳蹤。而名公之家範。宛然足爲吾黨取法也。譜及彼時之覩記。而當年之人事。犁然足爲後人考鏡也。異日者。公論旣定。太史氏秉如椽之筆。爲先生不朽。先生之品。昭於日星。濱行一段光景。諸君子雅有能言之者。初不以斯譜爲有無。然凡諸爲先生殫厥心力者。必且旁及此。則文實與聞。諸君子未必知也。則斯一譜。亦採擇之所必資。其可少乎。獨是文實拜先生明賜。竟於含殮不及躬親。北行之意。謂何。何以謝先生於地下。則斯譜也。初無解於文之慙負也。第先生者。時局之所深忌。其爲先生者。時局之所深求。所宜深藏勿露。留爲日後張本。可耳。慎之哉。慎之哉。丙寅一陽月。三復居士采祖文識。

任俠傳

朱文學

吳門布衣金日升纂述

文學諱祖文。字叔經。完天其別號也。世爲樞李人。祖先應募禦倭。功最。累陞都督大將軍。世襲蘇州衛指揮。以廉勇聞。文學幼孤。母劉勵節撫之。備集荼苦。文學長而端方穎異。雅不好武。被服躬行。有古人之風。弱冠補博士弟子。痛母志節未揚。不遑寢食。吏部周公順昌初未識文學。會文太史諱震孟字文起爲孝廉時。與文學習談其母貞操。特詳吏部聞而憐之。慨然爲白當道。得類題取旨部牒下郡。而文學始知。乃爲之感泣搏頰。願爲公死。無何吏部忤璫被逮。變起倉卒。都人士惶懼不知所爲。文學念此行必無全理。願相隨視其後事以圖報。慮家人或相勸阻。遂不復歸。與吏部同宿公所。中夜從容謂吏部曰。公灑然就道良善。然事未可知。脫有緩急。誰可告者。吾當先往爲地。吏部首肯。良久曰。徐銀臺諱如珂字念陽。肝腸如雪。必能相濟。顧侍御諱宗孟字巖叟。新入臺中。意氣不薄。可與計事。此外則定興之鹿諱善繼字乾岳。吳橋之范諱景文字質公。熱腸急難。一言相諾。生死不渝。皆可告者。文學遂別去。先走都下。比吏部未至。有以滅門事中吏部者。得銀臺力辯而解。至臺饋薄煇之事。侍御已先爲之所矣。已而懸賅數千。文學私幸旦夕告完。或得議獄緩死。百計勾貸。都門不足。則走定興。定興不足。則走吳橋。冒暑單騎。間關千餘里。逗留數十日。捫撫稍就。而吏部已斃獄。

矣。吏部畢命之日。文學夜宿野店。有聲魂然。精誠相感。豈其誣耶。文學微服僻處。偵察動靜。每一感慟。聞者悽惻。凡往來津渡。出入禁門。時遭邏卒。徼倖獲免。亦危矣。然以身滯長途。弗獲視殮。有違初心。遂至鬱以死。彌留之際。猶以吏部後人爲念。嗟乎。文學之所以報吏部者。不已至乎。而總爲一念孝思所激。夫以文學之至性篤行。固足不朽。矧其附青雲之士哉。

北行日譜者何。完天先生譜先忠介被逮始末也。載其行事。日月具悉。歲久原板殘缺。將不能垂後。令子叔高。廣搜鐫補。其孝思足尙焉。先生懿行。頌天臚筆傳中。略見一班。宜刻篇首。俾閱是譜者。知先生楷模士林。不獨信友一事而已。先忠介被逮在天啓之丙寅。距今四十餘年。其間滄桑陵谷。真如夢幻。追思昔年情實。非所謂抗節死王事者耶。讀之不勝泫然流涕也。時康熙丙午中秋前。周茂

蘭謹識。

丙寅北行日譜

明 朱祖文撰

文之獲交蓼洲周公也。則自先慈旌節事始也。先慈苦節四十有六年。緇維免喪之日。爲庚申歲。同庠欲以苦節狀聞之當事。文私以商之。今太史湛持文先生。時先生猶孝廉也。先生曰。此事非財力兩足之家不可。今子家徒四壁。一青衿其何能辦。雖曩者吾甥姚現聞。曾於孝廉時獲旌其母。吾蘇顧巖叟亦曾於諸生時獲旌其母。亦皆有大力爲之援。今子無可傍借。將若何。文曰。母節艱辛。爲人子者不能一爲表揚。何以爲子。文志決矣。成不成人爲政。請不請我爲政。先生亦甚壯之。夫以先生爲名教宗主。而先父誌又出先生筆。凡諸艱辛之狀。無不具悉其詳。且爲文慎重若此。則事之不易可知。乃蓼洲公文初未一面。第感動先慈之節。於殷汝劫名獻之一言。而徵信先慈之節。於文先生之一誌。咨嗟歎息。惻然垂憫。遂力言於當事。自郡邑大夫以至憲司。直指不遺餘力。且曰。此事非公祖父母力爲主持。而待胥吏循行故事。則此節斷無蒙旌之日矣。迨旌表之旨。奉已半載。禮部劄至。文始獲知其爲德何如。而不鏤心銘骨也。嗣是文中心藏之。第以公名位懸隔。雖蒙折節下交。然引分自安。非歲時不敢輕謁。比公奉削奪之命。乃始時時過從。察公神情。亦若以文非趨炎附熱。不虛疇昔之知者。此文與公締交之案也。今歲三月之十有六日。天方曙。忽聞公被逮。大駭出門。彼時便已心念公此行。誰與偕往。意者其文乎。第長子館於浙。次子病

於牀。季子身爲督課不能脫然。比至通衢。遇公西席。鄒君虛王。名谷涕泗沾襟。欲偕北往。文念鄒體弱不堪。力爲之阻。而遂身任之。公聞亦喜動顏色。因目吳君公如曰。子其爲我一行。公如唯唯。乃議文與公如偕。公之子子佩行。已有成說。是日諸君子便欲文與緹騎議所需。文曰。旣文北行。不當使緹騎識面。以便彼中趨事。遂以斯事他屬。十七日文念十八開讀。公身一屬緹騎。便難披瀝。復造公所。冀得詢所欲言。而諸君子無論識不識。或揮淚。或懷金。或欲一望清輝。而至者。踵接肩摩。聲如蚊聚。形如蟻擁。無須臾之暇。維時有貧士某。乃公素所恤者。不勝痛向公而泣。公笑曰。我一去不復返。誰卹爾者。我應哭爾。爾反哭我哉。會有蔣兄。名鎮者。語及傳神一事。文躍然曰。是烏可已。卽託蔣促丹青君。丹青至。文爲道意于側。公斷斷不可。再四揖丹青君出。若將浼者。噫。公視此身爲何物。曾有幾微兒女子態耶。午餘諸議者至。云與緹騎講許八百金。苦不能就。必欲文一行。文知諸君非爲舌戰不敵。特以文爲公所信。其勢不能無增。姑借作一證據耳。不得已乃行。然旣以登場。不能不認真一講。乃以公之冰蘖告。而諸旂亦盛稱公之冰蘖。且云。倘公而不冰蘖其操也。必且列卿寺擁節鉞矣。自苦乃爾。何與人事。吾儕奉命而來。祇論官局索金。不問其貧不貧也。文曰。然則金從何來。諸旂曰。獨不有鄉紳在乎。文曰。否。法網嚴密。覘伺者多。一爲捐助。懼有起而議其後者。疇敢以身試哉。諸旂又曰。然則獨無親友乎。彼其至親安在。文曰。言至此。則爾所謂自詒伊戚。子亦不能不爲三歎息也。親莫親於子女之好。速公且爲貧交是求。卽如長子之配。於時鉅富兼閱閱者。多願與公聯好。而公謝客曰。乃公如欲富。則歷官二政。儘足自潤。何必借潤他人。而令富女入貧

家。其與我均茹荼乎。抑與我齎荼分茹乎。且使我父子姑媳。有大不得其所者。幸勿復言。假使公當日。可爲俯就。則今日之費。問之媼家足矣。又何必煩吾輩之喋喋爲。諸旂不無心動。然似已調諸好義之樂助者多。乃下八百之外。漸增數以千計矣。而堅執如故。遂各含淚而別。是日文卽宿公署。人散一燈熒熒。文方欲叩公所欲言。公且出竹籬六七柄。從容揮毫。書至二柄。漏下已幾二十刻。文不能復待。力止公書。公乃略言數事。無宛轉叮嚀也。文因笑語公曰。今夕光景。千古希觀。何幸躬逢其盛耶。十八日天將曙。諸議者復走使從公所促文。文計不一二時。且開讀事急矣。其敢有辭。乃復匍匐往。則諸君子邀有魏某者云。是故錦衣書記之子。言當易投。遂與偕入。魏人不措一辭。便慨然以一千三百金許之。先交四百。於是諸旂滿志。報命於公。時公伯子淚從心下。強顏相對。公仲子年方總丕。見公將出署就逮。淚不自禁。公怡然曰。我天君方泰。反爲若一哭所累。其速去。毋擾我。時已報午。諸司畢集。士民填委。而直指中丞。且先後至。詎意忽有官旂之變。於時變出倉卒。赴義如狂。文以褻服不便入。踣躅竟日。比暮。知公請囚不得。乃歸公所。公所爲兵憲行臺。防守甚密。文惟外望而已。十九日文念公已無生理。而重以斯變。其謂之何。造憲署苦不得入。至晚當事者復移公入縣署。始得晤公。公是時了無怖懼。但多一番煩惱。曰。如無此變。則斯時我已從容就道。奈何有此紛紛。少選公坐帷中。呼文耳語曰。誰爲我語當事者。嚴兵衛我。聞道夜半馳出城乎。而一時友生愛公特甚。哭聲震天。中有倡高景逸先生之說者。文謂公事與高先生微不同。高無民變。一自裁畢矣。公則多此一節事。須徐議。于時萬民擁塞。公赴闕之心如焚。文寬之曰。俟民心稍息。公

始可定行期。此時一動，變更不測。公乃首冠，復事筆研，爲一僧書扇，書齋額寄去曰：事雖小，不可負諾也。門外河洶，門內蕭蕭，被逮之始，親朋雲集，自民變後，皆畏禍不前。時來詢問者，不過疇昔莫逆寥寥數人而已。是夕，文仍陪宿縣公署。二十日早，公乃笑向文曰：患難相依，我兩人真堪合傳。文曰：公當此際，而神情不動，乃堪不朽。若文之棲棲，特情不能已，何足道哉！自是日爲行計，乃命同人佯播候旨之說，以息衆囂，而民亦稍稍解矣。是夕，文歸，密爲束裝。彼時訛言孔將諸親知方促文趨避，何暇議及北往。內人一見，驚相謂曰：禍且旦夕，聞公椒蘭成栗，栗懼及，而比鄰已東奔西竄，巷爲之空。汝速禍乃爾，如一家生命何時，文承爵之子壽康，新膺衛秩，伏枕傳語曰：祖助不易，父此行或有他失，如祖助何？文笑曰：事果株連，豈一避能免？奔竄特愚夫事，智者不爲。乃若北行業已心許，其忍相負，倘果緣是而及於難，亦命數使然，非予所得主也。其止勿復言，惟是內人喃喃謂公往必死，死必慘，奚不死於故鄉，而務往罹慘毒？則文中心不能不爲動，就枕躊躇竟夕。詰朝二十一日，往關廟，私以自裁之說卜之真君，籤若勸行，而自卜從行，則頗有危語。然念事勢至此，義無中止，復自奮曰：司馬公有云：天若祚宋，必無此事。今天若憫我，亦必無此禍，豈得以或然之禍而奪必然之義，遂不復介胸中？則往。文太史支十金爲行裝，往別本學吳師。名麟吳師曰：民變之疏，十九已發，公卽往，無與於旨之溫不溫。公身一往，萬一斃于嚴刑，已無足證，而金吾於公獄詞，以民變事株連一二縉紳爲彼黨所心恨者，則一網盡矣。何不從容旬日，處分後事，以一死了局。公止公身，以全諸紳爲愈乎？文念株連之說，實彼黨所有，然在吾公，惟有赴闕爲正，故前說謂之忠于諸紳。

則可。其爲吾公謀。猶似有未盡善也。然不敢以一己之見。傍撓其閒。遂唯唯。二十二早。公馳使相召。則已遷寓理刑公署。公署舊名金鄉書院。若爲候旨者然。文意公或爲前說所動。至則促裝耳。於時馳一价以力阻公行。

者言媿媿。公則計不反顧。毅然以一身甘鼎鑊。且曰。若輩爲所欲爲。苦無大人君子張膽明目教誨之耳。我且甘身糞粉。正言教誨若輩。是日文復馳歸。計彼時文雖足跡不至變所。然朝夕吾公必已爲覘伺者。物色其能免于吏議。倘此往或有起而議其後者。不能分身相應。必且以逃匿相加。實其罪案。遂草一呈。直以同公子追隨吾公。明告本學。以爲異日張本。囑家中一俟發足。卽投。而文子壽增尙未冠。見此行不可止。遂力請從。曰。父老矣。長途左右。其可無兒。文笑曰。兒念甚佳。然此苦趣。非兒所能嘗。萬萬不可。力止乃已。二十三日。爲合饒明卿太史之日。文爲倡于旬日前者。文念知己在難。何忍銜杯。遂不赴。而卽于是日赴公署。爲長行計。公之長行。實惟二十五日子夜。文恐栖遲家中。卽有剛腸。或爲兒女子所撓。遂一出。不復歸。壽增苦欲識公。遂與偕入。此兒因文在署。連造三日。炙公清輝。不可謂非幸也。又公見此兒持有竹籬。特爲之題。手澤宛然。不尤幸乎。二十四日早。公呼長子拜文。文曰。若然。是以不肖待文矣。公乃止。而反躬爲之叩。顧長公曰。從此以伯呼之。文遑遽不敢當。是日聞申中丞元翁罷官歸。文與中丞爲舊賓主。且爲先大夫生平知己。大父身後。先年百戰助。得微橫金世爵。實惟中丞力義無不往候也者。復念此身一出公署。更復牽纏。公之今日。是何光景。文旣戀戀於此。卽不往。不爲愬然。乃第以一函致意。是日公語文曰。弟別無一事牽腸。獨先人未葬。此死不瞑目之事。蓋簞仕之日。旣所不及。里居數年。營有馬鬣。一切

地下之事已爲畢辦。第以年月未宜。故爲稍待。今不幸值此。幹父之蠱。有吾子在。兄其輔襄大事。無一語及妻孥。自被逮迄今。如一日也。文因謂公此行存亡未卜。且與家人永訣矣。就道之日。尊夫人攜諸幼子登舟。可得一別。公搖首曰。徒亂人思。不可復詢。公以公今日有此奇禍。自反歷官。亦有一二冤獄。爲公隱衷所不自安者否。公隨聲應曰。此弟一生可自信者。今日之事。蓋往因中業。如不通釋典。幾不能自解矣。二十五日長行。館于浙之長子。因呼遲約其歸囑家事。而尙未至。遂不復待。是日文計公此行決無生理。文豈能別効一臂。惟有一抵長安。速治棺槨。以待一有不幸。則躬爲含殮。以効友朋之義。以慰孤寡之心。此出門作想也。是夜漏下二十餘刻。遂行。比及舟。彼時兵士戒嚴。胥江之漕幾無隙地。地旣泥濘。人復蹂雜。昏黑中忽失長公所在。蓋使者唐元恐爲緹騎所物色。私與偕歸。公忽出意外。念甚。呼文覓之。乃與兒壽增於昏黑中。自胥江至洞涇。匍匐將十里。抵公家。已漏下四十刻矣。知公子已歸。懸旌始定。二十六早。於公家發舟。是時公內弟公如吳兄名爾。以有太夫人在堂。恐遺母氏憂而止。乃獨與公長子子佩行。是時送文登舟者。則惟張氏孟舒名世。異度名世。兩伯仲耳。二十八早至雲陽。公已有成命。立趨子佩歸矣。逆料公心。民變日傷。其少年緹騎一人。未必不爲報復。而又戒心於江漕相失之事。故深爲之慮。子佩含淚向文曰。父決不欲我往。奈何。文曰。尊公自有深意。父命其敢有違。且斯何時也。母夫人柔腸欲斷。兄歸苦慰母夫人。孝自在耳。力勸之歸。已而四月初旬。奸人忽造僞旨。謂籍沒公家。家人一時星散。夫人幾欲自盡。微子佩力爲寬解。夫人已蠱泉壤矣。子佩此歸。不可謂非彼蒼默佑也。於時文亦私轉一念。公之子

公且堅不欲往。則事之危殆可知。然少生退怯。如一己之生平。何遂獨任不辭。偕公使唐元嚴秀二人先公而往。擬從雲陽登陸。而唐元以驟貴。欲走瓜州。會此時彼地諸旂羣集。恐爲物色。遂從其說。至瓜州。則天雨泥濘。而又計從清江浦登途爲便。乃遂往清江浦。二十九日舟抵維揚。候關。兩僕登岸。有長髯呼之曰。爾已來乎。不爲應。則又曰。爾蘇人也。若素相識者。然回述于文。殊爲之異。初二從清江浦登陸。有差騎一人。馬已馳過。忽復馳回向文。亦曰。爾已來乎。不爲應。則又亦曰。爾蘇人也。爲之唯唯始去。方宿逆旅。唐元私語文曰。頃之差騎。寓適相對。又復相問。而其語若知我等蹤跡。文疑此必織造之使物色。偕來者。此時有公致鹿職方孫孝廉兩函。遂欲焚之以滅跡。而又念非此無以取信二公。方擾擾胸中。忽有羣捶逆旅之門者。其聲甚厲。則謂必差騎。我擒無疑。靜聽。乃縣役呼里役也。抵寐使夢先都督至。文急訴以北行之故。及商焚書之事。先都督熟視不言。比醒私念。不言者似可付之無言也。乃不焚。而以書入唐元臥具。蓋搜必先文。文之行囊。彼所注意。元之臥具。彼之所忽。萬一可倖脫耳。初三日。始知此人。昨偶乘差騎。早已僱驟而去。驚心始定。及之前途。乃舟宿處。曾一識文。故爾相問。心始帖然。初十日。宿陽谷。覓有民變明旨。旨甚溫。爲頌天王聖明也。十六申刻。文枉道抵江村。日將暮。託爲公之內昆弟。謁鹿公。名善繼。號乾岳。定興人。住江村。蓋公之長子。旣不往。非至戚。恐不便吐肝膈耳。鹿公一見。泫然相對。囑以鋪堂之事。懇其至親。一往。鹿公卽刻馳使。邀孫公相議。孫公。名奇逢。字啓泰。容城人。居容城之北。相去二十五里。比至子夜矣。十七早。會孫公以無可効力。懇蹙相告。先是魏廓翁被逮。吾公會致書二公。以魏事託之。時孫以兄往。鹿以使往。文曰。魏公事。

兩家俱得借重。而獨不可爲吾公一行乎。孫公曰。正爲往而無益耳。文曰。然則魏之鋪堂。誰爲講者。孫曰。此事最易爲人欺。維時有金吾王公名洧民。受恩于廓翁者也。密會公子於某所。公子以是託之。王實私爲料理。吾兩家初不能効一臂也。今周因魏而逮。王旣德魏。未有不圖報於魏之椒蘭者。意者其於此處一圖之乎。文遂躍然就道。十八晚抵都門。念都中戒嚴。必先得藏身之所。乃可有宗都督者。其父諱禮。於世廟時死國難。先都督因與定交。文與宗氏有世講誼。妄意此可暫爲居停。十九卯刻及其門。詭以他事往求爲信宿。於時都督伯子宦遊。惟仲子太醫。叔子文學在舍。兩君相對。擊盞告曰。此閒大非昔比。卽戚里侯門。無不惴惴危懼。倘客非其人。十家連坐。君以異鄉人吾門。比鄰已有密爲覘伺者。君其務就逆旅乎。卽求一宿且不可。卽欲行裝。暫入其門亦不可。不得已。主僕三人。反揚鞭長安道上。索客肆而解征鞍焉。于宗氏閱邸報。得周某旣已就道。不必深求之旨。深爲公慶。又有密擒首惡之語。又不能不爲桑梓隱憂。而見宗氏一番光景。便知京師氣象。於時有五百餘金會票在身。會票無姓名。而所會之家別有家報。恐存周氏字樣。亟往其家付書以滅跡。念公一到。惟鋪堂一事。最爲喫緊。而京師多巨猾。重信恐誤事。輕信或受欺。敢以此事問人乎。必得當道縉紳密爲區畫。計非王金吾不可。而苦莫爲介紹。又公所囑。二三金石之交宦於京邸者。其非吾鄉。旣難輕謁。而一屬吾鄉。又恐緝事于彼。出沒必得一人焉。密達于與公。金石之鄉紳乃便。於時有蔣士衡。名秉銓號台字者。文之通家友也。以貢館於京。遂蹤跡而往。蔣一見密聞斯事。不覺失聲曰。此乾坤何等時。兄柰何自投此地。文亟止勿言。已爲門弟子所物色矣。是日卽宿士衡館。囑

其託侍御王純甫。則王公已奉削奪歸矣。噶其託念陽徐公巖叟。顧公併託二公轉致羅孫諸公。求爲助一臂。又求徐顧兩公問王金吾。特爲鋪堂之地。其會票金。併求二公司之。蓋文生平不敢與人出納。且此地出金於何作證。一與斯事。生平掃地耳。士衡曰。爲此公用情。及轉致數人。兩公之所必然。至會票出納。此必不得之數。文曰。兄第往商。無妨一問也。是夕與士衡同榻。士衡連起詢問。無非一片熱腸。其館使詐。耐屬耳。文力止勿言。士衡不悟。此其家喧傳之所自來也。二十日味爽。士衡亟往徐顧兩家。文復叮嚀曰。客肆祇可片時。不宜久處。不審兩公能爲我旬日主人。俾得暫匿其身否。良久士衡至。歡然報命曰。兩公正爲此公深慮。不虞兄之慨然來也。王金吾亦削奪去矣。鋪堂事。顧公已身爲之任。立刻多方覓問。不必再計。所欲致意諸公。已爲詳談。不負所託。至于會票之金。入此出彼。於縉紳自屬不便。有吾蘇朱盡吾者。名汝忠。參戎。向固交好于公者也。今以補官將出都門。正有一事借重兩公。兩公爲暫留以待。周至了此鋪堂一局。會票卽以付之。乃若居停信宿。則斯時覘伺者多。兩公俱以爲不可。且囑兄勿往謁。事旣粗有梗概。遂別士衡。而走蓋吾朱寓。以會票交之。因詢有藏身之處否。則指二閘之觀音菴。時已薄暮。移寓須俟。詰朝而文寓門以內。朱寓門以外。禁門森嚴。正陽尤甚。一出一入。殊有戒心。求宿朱寓。朱以寢所不便。辭。二十一日。留唐元於正陽門外。候吾公至。而文則移於二閘。道經前門關廟。虔禱得籤。遂決往所指寓。入別朱適巖叟。顧公爲吾公事造朱。知文在寓。入密室私會。文再懇鋪堂一事。顧出手書相示。正爲此事與諸公往返者。矚蹙而談。不能百餘言。卽矚蹙別曰。弟亦不敢久留。蓋恐爲從役所窺耳。是日往菴。二十二日

復造朱寓。呼唐元探公音問。尙屬杳然。抵暮而返。二十三日。唐元至菴云。公使錢真已至。公旦晚抵國門。蓋真中途先行者。有八行相通乎。文曰。爾主人左右皆緹騎。此時初至。正覘探者。鞫伺之秋。八行或入其手。執簡索人。吾事債矣。錢真既至。正可託真面復語。不必多多。恐傳誤。今止有三言。寄語爾主人曰。定與以無益不來鋪堂。願公已身任停妥。會票已交付朱處的當。言之至再。元遂銜命語真。其不直令唐元將命者。則文既潛身。而公隨身之使。亦相戒不輕來寓。以防蹤跡。特留唐元一人。介於兩間。爲通音問計。不欲使緹騎識一面耳。二十四日。遣嚴秀至朱寓。則朱以奉勅不能久留。二十五日。且行。召文至寓。以已支之銀。未支之票。轉託吾蘇查君獻可。文復馳往。而士衡適至。同付查君。文約查以五百金。非徐願兩公命不可動。其五十金。則聽錢真零支。但須取有支票存照。士衡密傳顧公囑公之語。于文語外。復曰。聞廠衛端爲吾公密遣緝事者三十餘輩。緝其用事之人。兄其善爲藏身計。是時頻出入東直門。及往來正陽門外。大非易事。乃特求寄宿朱寓。朱以是夕移櫓。餞者若而人。於文不便爲解力爲之拒。不得已而始納。究竟無一人至者。一時彼此畏禍景象可知也。於時朱欲壯文膽。以好語相寬。謂周繆兩家親友。亦有倘佯長安道上者。文不信。續據錢真面述。吳江周祇有四僕。別無親友。其子至德州而返。黃公白安封翁抵京。爲邏卒所獲。罄其腰纏六十餘金。猶欲送問。賂以五百餘金始脫。父且如此。他人可知。朱所教不幾敗。乃公事乎。是夕吾公至京。相違咫尺。不敢走晤。徒有腸痛耳。二十五日。回菴中。念菴爲車馬往還之區。耳目實繁。當此網羅嚴密。可不幾先藏匿。乃于二十六日。走張灣。而與唐元相期。倘有相聞。當于彼地舊關廟。

相尋亦盡吾所指也。二十八日不聞音問，乃遣秀入京探聽。是時特爲民變一事，萬分過計。走書查君處，可囑其豫備後事以待。惜也。查君惟望其生，以爲必不至此。烏知究竟至此也。二十九日嚴秀至，始知公已於二十八日受刑。僥倖無恙。是月無三十，乃于五月初一復回二閘。而唐元來寓云：已坐贓銀二千兩，計無所出。有兩泣泥首大士前而已。是夜竟夕不寐，則擬先作書寄報房達知家中設處。而遣元歸爲齋。來京會票計，又恐別有差失，則叮囑填寫查蔣二丈面兌。非此二丈不得擅支。以寓其隄防。然自北而南，自南而北，遙遙數千里之程，又無中生有。處此多數，夫豈易事。大約以五十日爲期，倘公五十日之內，緣此而斃，何以自解。乃擬身走定興，乞鹿公轉貸，以應一時之急。乞孫公昆季入京預備後事，以防不測。謀既定，初三日方遣唐元發報房書。是時會票金已他屬，欲染指者不無垂涎。而錢真忽至，以處贓金爲名，苦佞文歸。且曰：此公意也。廠衛緝訪果有其人，且五十餘輩也。因出公與真書有火燒速去之語。蓋文居火燒坊下，故作隱語。且曰：不歸恐有奇禍。文念此行實受公生死之託，卽有奇禍，亦是數應同盡。乃若斂金自有異度。文起諸君子在，而須文往爲復。念公瀕行其相託何如鄭重。乃忽於此時反命之歸，意必有悞之者。因問我有三言傳語，曾一一達爾主人否。真卽隨聲以應。乃曰：主人甚怒鋪堂不敢回復。已而命唐元將文之言復告于真，令其止達二語，不必提起鋪堂。真又不欲元歸，大有相角之意。文苦口曰：斯何時也。而暇脩一時之怨爲也。且彼此歸，專爲贓銀一歸卽來。酷日中往返五六千里，較之安坐旅邸者，甘苦勞逸奚啻霄壤。子何所庸心於其閒哉。因悟真與元不睦，遂不免翻異。其閒應歸而不使之歸，併前百

方促文歸。蓋有全非公意者。爲作色不怡。真乃唯唯。又與語及欲往定興一節。真又以爲不可。大指以前既虛往。再往何益。而且爲公語以阻之。然鹿孫兩公文所得于覲面。知其曩之不來。蓋屈於勢。而情則有餘者。非忍也。乃堅持欲往。是日兼聞贖金復加一千。五日一比。初七起限。當此之日。二千且不知於何措辦。豈堪更加爲之苦極。初三錢真別去。初四早。唐元持錢真片紙。留文往定興。而命唐元往蘇云。此徐公意也。當卽達知主人。噫。文未嘗歸也。而又何有于留乎。是早三人從二閘發足。彼時文付唐元達諸公書。皆爲隱語。不敢明言。蓋恐爲邏卒所得耳。而錢真不知此竅。直以公與真書寄歸。凡諸隱語。詳爲訓話。文有難色。唐元曰。請留在便可齋。則齋倘有他虞。卽刻毀去。何如。文勉爲之應。不敢入便門出。張義乃取城外他道行。行不二十里。卽有番卒三人。叱下騎搜檢。是時急甚。文與嚴秀先以行囊與此三人。一一簡視。而更以他語支吾。唐元則乘此之隙。將前書囑去。毫無蹤跡。乃免于難。噫。亦危矣哉。初五日午刻。抵涿州。遣元歸蘇。而文則分道走定興。初六至鹿公所。鹿公一聞文至。不待通謁。卽趨至門外相迓。告以乞爲轉貨。應一時之急。併辦後事。以防不測。公於轉貸立爲首肯。其于後事。則以爲事不至此。文泫然曰。有備無患也。鹿公領之。立刻馳使邀孫公。孫公至。便立刻召兩家金石之交。分道問金。蓋孫公之貧。不減原憲。而鹿公躬耕自給。別無長物耳。次日鹿公顰蹙相詢曰。有如公或不諱。此金得徵。徒納乎。文曰。公卽不諱。賊無不完。是周氏必出之物也。文請自立一券。吾公得生吾鄉。金至固立償而去。設有不幸。文自在也。其忍負公。公笑曰。事不得不詳問耳。安用券爲。正爾先爲貸計。續商後事。乃初八日。忽聞初六京師王恭廠地

雷之變。嗣閱邸報而知是變也。地裂一十三丈。火藥騰空。不焚寸木。而傾覆屋宇以萬計。壓斃男女以千計。聲震宮闕。爲今古所未有。朝廷脩省定刑之旨。且先後下。則妄意吾公不死矣。遂置後事不講。而揣心稱貸一事。彼地涼薄。富家絕少。又非素所往還。難以告急。一時不能彙集。文則此衷急于星火。然不敢形諸齒頰。蓋恐急則數不及額。非特來一番意耳。踰旬至二十日。始得三百金入手。二十金定與令王公名諸齒頰。蓋恐急則數不及額。非特來一番意耳。踰旬至二十日。始得三百金入手。二十金定與令王公名錫人。無所助五十金乃鹿之姻家羅公。名萬因知其棄產往貸二百。羅以五十應。且云不必報復。鹿公則以貸而得助。與自至之助不同。仍應作貸。又五十則諸君子賄左公浮丘奠金。未入左囊。而斂存孫公處者也。其八十則孫公之親某不問子錢。而以其本緩急者也。其一百則賈人某之母錢。月索利二金者也。共三百金未付金前。孫公已知文非內昆弟。第見文肫懇。乃不他慮。而直以金付文。因借鹿使一人護行。蓋吾輩書生。非得幹僕左右。恐爲多金所誤。且使兩公知此金著落耳。公以老僕趙姓者往。二十一早疾馳。是晚宿琉璃河。聞是日朝天宮災。無端起。火正殿悉焚。不兩旬而兩以災告。何天心仁愛至此。二十二午抵京。入國門。門稅較之前月忽已加倍。氣象更覺刻急。一抵寓。立刻齋金付查君獻可。名口太查君問文于何寓。文不爲告。蓋此金之司有苛求金之所在者。查君若爲金穴。亦在羅網中。前金之交。查君亦有難色。恐其知文寓。則我能往彼亦能來。必爲完趙耳。卽坐查寓呼周使。一面周成至。詢知公禁中起居稍慰。問前者票金。正于二十七日一限將完。來金適承空乏。此後便有鄉紳助金接續。文擔似可少弛。先期再四叮嚀嚴秀。勿引諸使來寓。爲人蹤跡。乃秀于是日乘文在查寓反。飲周成于文寓。愚人不知利害至

此文之不爲番卒所獲。特天幸耳。是日欲發八行候公不敢。特索公與錢真手書。見公十八九日之書。欲差周成回蘇。催銀甚急。二十三日。文復作書寄報房促金。是午走蔣士衡寓。知巽者明旨所云漏網巨魁。意有所屬。爲之大駭。竊以是時文之往還。更爲稠密。益不勝惴惴。而士衡復曰。兄與某同姓。一爲番卒所緝。其禍叵測。不可不慎。文心感士衡愛我。二十五日。遣鹿使趙姓者歸。勞以白金半兩。堅辭不受。曰。公所處何時而敢領耶。主人知之。寧免督責。不與主人言此金。如沒公之德。何斷乎不可。比屈行。又私語嚴秀。曰。金雖不受。歸必達知主人。以表朱公之意也。嗟哉。此使其真使乎使乎。是日嚴秀道經錦衣衛。見黑氣一道。從衛前起。直透空中。風不能動。因知二十四日亦有是氣。不可謂非大異事也。二十六日。始得公與文手書。慰勞外。以吳橋之行見委。然不言吳橋。而第云有一遠行。不審可否。得錢真字而始知爲吳橋也。于時第以公急贖金。且天變後。定無死法。可以暫離。乃立刻作書奉復。且云。奚止吳橋。凡可効力。不妨多委。更不必惜文之勞。乃于二十七日。得公與范公鹿公兩書。鹿則文得于觀面。故曩者之往。無煩再計。范公初未識荆。且錢真面傳公旨云。范與張侍御爲姻家。張與公曩日相左。書可投則投。不可投。寧持回不投。勿生多事。文計京師去吳橋。往返一千三百里。委身于不可知之域。而念業已許公。難以中止。正徘徊間。二十八日。聞皇極殿前塔石。費帑金如千。經年累月而始至者。大工方待之告成。甫及殿。忽斷。都人駭傳一月之內。災異頻仍。意當事者必爲動念。吾公萬無死法矣。二十九日。錢真始遣周成回蘇。是日往別查君。適顧公舊西席王君原裕在坐。偶語及公。謂從公來京之使。喧傳六人。且曰。此六人者。徵逐酒食。猶

似居恆時。倘廠衛緝知。不以清吏相目。敗乃公事不淺。兄可不思善爲之計。文因悟公使三人。曰錢真。曰顧選。曰周成。三人者。原寓錦衣衛鄰近。以便承直公入獄。後錢周兩使留顧選于舊寓。而兩人移玉河橋。與吳江周公四僕同寓。旣同郡。又同姓。誤傳公使六人所自來也。公使俱儉薄。豈其有此徵逐事。但非分寓。何以自解。乃于三十日。晤蔣士衡詳語其故。囑士衡轉達徐公。令之分寓。且託之風聞。勿直告徐公。以語所自來也。是日午刻。卽出都門。居京旬日。逆旅主人見文謝絕賓客。而又與周使時密語。業有猜意。疇昔之夕。已有長髯居然闖入。四顧其行裝者。時公與范鹿兩公書。文先期折成指大糊之壁間。用是無恐。是時屈行。償主人日費。嚴秀計及秋毫。主人幾出猜語。文乃解行裝一事爲贈。以愜其意。始釋。六月初一。抵暮至江村。晤鹿公。以往吳橋事商之。鹿公擊節稱善。曰。此天下第一流人物也。徑往勿疑。至于侍御爲姻家金蘭之誼。豈爲葭莩所奪。必不其然。無相妨也。因求公一函介紹。立爲首寫。訝無公書。文曰。書中無非致謝語。范公書正在俯仰間。與公書有金且有數。恐爲禁門搜去。大屬不便。已付祖龍。卽范公一函折成指大粘之破襪底中。持至不易也。鹿公唯唯。初二早呈范柬於鹿公時。鹿公子孝廉名化麟字仁卿在側。見書不署名。不填號。曰。此柬無范年伯字號。得微以與吾父者。移之范乎。事若卸擔柰何。父書似乎難發。文少選進。曰。前與公書。有雷霆雨露無非聖恩。今與范公亦有此語。寧有與一人書而重複者。請以前書同此柬函去。則較然矣。鹿公徐曰。我來自發。前書不必同往。總爲至交。未爲不可。噫。公之肝膽何如哉。初三早。鹿公發柬。是日以初二日大雨。瀦水難行。乃於初四日發足。便道過孫公。以已意私懇孫公。致意于鹿。

求其再多方一處。孫公唯唯。因曰：前鹿公原欲以五百金相應，措處不及耳。是日即宿孫公家。初五寅丑之際，地大震，文臥炕上，幾爲墮地。已而知是日京師亦震。蓋震者千有餘里，蒼蒼之儆戒何如。文生平不慣鞍馬，前者長途每日馳驅不能五舍。至此炎威日熾，僅行一百餘里，途中遇泉飲之，不啻甘露。行至初八，始爲張蓋。蓋爲一手執轡，一手執鞭。僅僅支吾至此，暑極無可柰何。乃爲棄鞭擊蓋，煩苦可知。卽欲求如曩者之行，止于鞍馬之勞頓，不可得矣。苦楚中時時作想，不幸而生于三韓發難，彼時逃竄惴惴，恐有兵刃之及，莫必其命。求如今日，豈可得哉。則塵勞爲之頓忘，因自笑此一想，真一貼清涼散也。初九早至吳橋，謁范公。名景文，字質公，景州吳橋縣人。先以鹿公書往，鹿書中亦不明言吾公也。第云：與丈同年同官，弟識其手書甚真。末則云：一腔心事向誰說，令人徒憶平原君。書入，范公急索書，文曰：書非面呈不可。因問書係何人所發，文以公對。其使卽蹙額曰：我主人正爲公焦勞，苦無音耗也。亟延入，曩文之謁鹿公也，不覺酸鼻。因其使者相戒，恐傍人窺伺，淚爲之忍。然彼時之淚，猶能相忍不下。獨至此，則淚如湧泉，不能復禁。蓋與公就義之期，不能數日，神者先告之矣。范公相對泫然，不能爲情。良久方出公書，書中所懇，乃爲贖金甚急。求爲轉貸，覽畢卽曰：此項自是友生事，敢不殫力。卽命移寓別業，因識其西席康用舟。名允濟，兗曩文之寓鹿氏也。去京二百餘里，鹿之北閭，無非閹宦主僕二人，深藏如處子，不敢一窺戶外。至此則去京幾七百里矣。范公亦相戒勿入市中，噫！世道至此，真可畏哉。初十早，范公走使趙姓者，將命許貸三百金。而令文回鹿公處候金。蓋文與公無一面，所憑者吾公之片紙，所信者鹿公之一函，金送鹿處，在彼出納。

始有著落。深服范公作用之妙。是日宴文。又識其西席李仲昌。名應期。濟南臨邑人。兄蓋康課其族子。館于別業。李

課其長君。

名元超。字君平。年十八已廬。

館于家。二兄俱篤行君子。而李更饒意氣。私慶得朋云。十一日范長君奉公命

先施。聞此兄於朋從一切謝絕。惟有閉戶讀書。而得一再交臂。卽其師仲昌亦歎爲異數。十二日入別。知

范公已有柬爲吾公求援于東光。蓋東光乃時局中要人。居相去祇二舍。因留候回音。前文初至。公使詢

及張侍御按蘇。與吾公齟齬之事。且曰。近有柬入京。曾以蓼兄事爲託。語語見報。而獨此語未報。想忘之

耳。必無芥蒂理。文念侍御與公爲姻家。不敢直達。至是已悉公肝膽。遂直告曰。侍御萬分芥蒂。近日京師

一聞民變。便揚言曰。聞此事。乃周公子所爲。糾衆抗旨。大是異事。諸紳相顧錯愕。不敢發一語。時徐公念

陽在坐。獨抗言曰。周子年未弱冠。能幹此許大事耶。方入蓼洲于死地。又坐其家以族誅。烏乎可。芥蒂可

知。望公力爲之救。范公駭然立許解紛。因問金至鹿處。二十前後不遲乎。文屈指曰。金之比五日一限。每

限百金。可以支吾。自六月初七比起。前有會票五百。已完五月之事。今有鹿公貸金三百。併吾蘇及吾公

知己之宦京者。聞可得五百。計可支持至二十左右。不爲遲也。范公頷之。蓋知公之金問之他人。他人爲

政。一迫便不能多。不敢聊且塞責。且屈指扣數。自是如此。初吾公手書稱文至戚。而文亦以內昆季自居。

且更姓名爲余。至是見范公情真意懇。便以實告。公爲再三歎息。因以蘇郡人物下詢。矢口而對。與公疇

昔所衡頗相符合。公復垂詢。兄往還定興。彼地有楊椒山先生祠。漢張桓侯翼德故里。曾一謁否。文過兩

公祠。曾默以吾公生還爲禱。幸無虛公之明問。因自念忠臣義士。令人景仰若斯。真雖死猶生。烈烈千古。

吾儕可不知所以自勉哉。十三日再別范公。見東光回東外。兼得與使者口傳之語。許與諸要人處。緩頰爲之欣慰。臨別文正欲泥首以謝。乃范公先呼童設毯。曰：同爲友朋。而兄獨任其勞。敢不再拜爲之稽首。文不勝惶遽慙愧。別出。鹿公之趙家幹已奉公命至矣。蓋文爲貸金。非得護行者不可。先期與借至此來耳。不虞范公自爲遣使。虛其往返。范公復以程儀二金爲贈。文既仰其貸。又拜其貺。不可。乃堅辭。使者三爲往返。已而仲昌移樽相就。使者以公命乞仲昌一言。文直告以不敢拜之故。而仲昌猶相強不已。文乃曰：請留公所。爲歸途壯行色。不可乎。乃止。十四日從吳橋發。足天既炎甚。又計金至之期。尚有數日。乃從容徐行。十七宿雄縣。是夕夜方半。文臥室之門發。異響如捶擊。急起四顧。寂無人跡。惟明月滿庭而已。爲之大駭。自離故鄉。絕無音耗。而出門時。次子病甚。且爲民變一事。罪罟方張。深虞波及。則以爲文家必有他故。寧知吾公之變。正于十七之早。由斯言之。非公之英爽而誰也。痛哉。十八至容城。過孫公。是時文之出入京師者再矣。自聞渠魁之事。十分戒心。當此邏卒密布之日。曾幾何時。而禁門頻出。頻入。恐爲物色。宜留此行以防公之不測。且吾蘇之金。或不及數。鹿公處畢竟可爲曲處。前已露意。孫公所宜潛蹤靜聽。而齋金往京。非得一的當友不可。乃懇孫公。慨然應允。議其弟啓美兄。名奇彦。號思皇。選貢。往。且曰：此間多中貴。亦有一二相識者。此行兼可一詢其中喜怒。則私心益慰。十九至江村。二十一日午刻。范公使者齋金二百。不能如三百之數。迨文歸途謁范。范告以前約三百。蓋爲某二千石曾戴德於我可貸。不虞竟虛所往。乃不得已託李仲昌叩之中丞王公。名洽。山東臨邑縣人。得金一百。又叩之某某。湊金一百。不曾沿門持鉢。殊不

自謙是日免封范公金。鹿公復出金一函，計三十兩，曰：此止生茅君助金也。二十二日，孫啓美兄偕鹿使趙家幹、暨嚴秀同行，往還之資乏，已叮嚀嚴秀，乃鹿公則命趙家幹齎金支應。孫兄又堅持不可，主僕二人已具有資斧，推讓良久，乃議各自支給。孫兄亦貧，與公未識一面，既任其勞，又損其橐，瀕行文向孫兄稽首以謝，曰：此弟之事，以累吾兄，敢不拜送。前文之往吳橋而過孫公也，孫公私語曰：兄之至江村者三矣，彼地鄰近俱中貴，不可不慎。昔魏公子之來，亦各處潛蹤無定居也。兄此回有弟椒蘭某某，俱可暫寓，兄其圖之。文心安疑，或者意出于鹿，而命孫轉致耳。領之。是時因向鹿公請曰：文其移寓以防蹤跡乎？公之封翁成字公名正，毅然曰：疇無友生，患難相依，情理必至，而煩僕僕轉徙，其安居勿動。噫！文此來，凡知其事者，皆以不祥人目之，惟恐或近，卽信宿亦人情所難，乃不嫌暱就若此，今人稱交誼，輒云肝膽，膽之一字妙矣哉！蓋非有膽，則惴惴惟恐禍及，卽欲全此一段交情，不可得已。於時文爲盛暑積勞所苦，身既病熱，腸復病寒，日僅一餐，困頓殊甚。方服藥餌，偷安牀褥，乃二十四日午時，嚴秀奉公訃音至矣。自天變疊至，聖心修省，以爲吾公必生，故吳橋之行，敢于身往，不意忽有此變，爲之痛極，不覺失聲于鹿公之堂。鹿公相顧錯愕，恐左右傳聞，乃爲強忍飲泣。嚴秀云：公之喪，已于二十二日之張灣登舟矣。文計錢，真未必待我，哀痛之際，一切都捐，則欲直走吳橋，以候喪舟，少展護喪之念，蓋吳橋去桑園一十八里，桑園者南，北舟楫之所必繇，於此相候，甚便耳。痛少定，徐讀蔣士衡來柬，則傳念陽徐公意，召文入京，而鹿公亦向文問轉貸之金，作何區處。是時范公及茅之助金，嚴秀與趙使已復齋轉文，已交之鹿公，曰：轉貸二百

八十金。今有茅助三十。范公所貸二百。先行交納。尚少五十。再作區處。范公之金。文自于京中問公助之。金償之何如。鹿公曰。二百自是質翁之金。子何敢過而問焉。聞前者此處之金。尚未用。子命一价相隨入京。齎回原物可矣。文曰。前金必用。文所知者祇元寶一錠。不便于納。託查君變易。或此猶存耳。數刻中公三問而文三以是對。不知未用之語何從而來。已而入京。會蔣士衡。文爲述嚴秀報訃。弟急索兄書。秀以烏有對。連索而堅執。烏有弟作色曰。蔣卽不發書。汝獨不可立索片紙以報我乎。如許大事。而僅憑口傳數語。懊惱良久。已而見秀手中片函。則兄書也。蓋是時秀痛其主。形神俱喪耳。士衡因笑問嚴秀曰。若臨行。我曾密語。尙有用存之金可來取。去亦忘之否。始知用存而誤傳未用。此語已忘于嚴秀之口。而先入于鹿使之耳。故頻煩鹿公之問耳。阿堵一物。易起猜疑。可輕與哉。是日范公之金。託鹿公轉璧。而以茅君助金。先清鹿公三十。帶鹿使偕行。以便償金。力疾起程。鹿氏父子祖孫。暨孫公。見文不堪之極。強相寬解。而別。二十七早入京。先會孫兄。約其攜金。蓋孫兄尙留京也。隨偕蔣士衡。謁念陽徐公。而知吾公十六日尙健飯。沒于十七之味爽。屍出于二十一日。喪發于二十二日。入殮。惟顧選一人在。而錢真則有候之舟中而已。四體五官。幸不全壞。第面似有物壓之者。鼻爲之平。已不可認。惟鬚與手足爲血肉。不能變處。則顧選猶能識之。所備之衣。已不能服。第安置棺中。噫。文此來。雖妄意公之生。然出門時。原意公之必死。祇爲躬親合殮計。故有此行。所以報吾公者此。所以慰公之孤寡者此。初不爲處金來也。乃竟大負本懷。徒令顧選一人。結公之局。出門之意。謂何痛哉。隨以鹿公之貸商之徐公。公曰。有鹿氏原金一百。存查處可

償。文曰：此外作何處分。意者其公助之金一爲取償乎。徐公以無存對。文又曰：意者其續到會票之物以踐宿諾乎。徐公亦以爲不可。噫。斯貸也。非助也。雖鹿公義當有助。然寧我以金如數往。鹿公以心之欲助者。卻其如干以歸我。則彼此兩盡。今逆其欲助之意。而聽其多方借貸。竟自償補。夫乃非所以自處乎。於時資斧已罄。告急于公。蓋文之來也。文與唐元嚴秀各持十金。唐元十金已于四月十六至江村用盡。文之十金爲唐元支去六金。乃以文自有一金。復支查處會票五金。湊足十金。併嚴秀者共二十金。自四月十七用起。頻往頻來。車馬餽糧。一切犒勞。種種諸費。咸于是取給。至此無復存餘耳。是夕卽宿查寓。士衡曰：卽動鹿氏十金爲兄資斧不可乎。文曰：償不如數。方切媿心。其可復損百金之內乎。計歸費須十金。弟自有一金。而范公處有不受二金。所必餽者。今得于徐公處稱貸五金。便可勉強就道。乃書五金之券與士衡。二十八日。孫兄與士衡先後至查寓。士衡擲回昨券。而以徐公命於查處支十金。此十金之支。出自徐公。文不與聞。隨付嚴秀。付文爲歸途資斧。意者其續到會票之物乎。文卽分一金密付孫兄。以勞鹿使。且囑其俟至良鄉付之。恐其來壁耳。隨交與孫其五十果元寶一錠之未用者。其四十九兩五錢。則曩留爲吾公零用之金。而非鹿氏之金也。曩文之稱貸于鹿也。原無片紙。至此不敢不以一券爲信。乃書一百五十金之券。封致鹿公。與孫相別。仍泥首以謝之。便爲趕喪之計。于徐公處。知公使于二十四日尙至查寓。於查君處。知公使於二十六日尙至查寓。蓋一爲買漆。一爲欲與吳江周使偕行耳。計喪舟不遠。乃從水路趕喪。柩二丈方別。大雨如傾。周行半成。巨浸不可行。是月無三十。閏月初一。馳驅泥濘中。抵張灣。聞喪舟已發矣。復爲疾

馳至此。則泥濘轉爲滄沱。求其馳驅不可得矣。有芻甸于滔滔已爾。是夕抵河西務。覓喪舟了不可得。方謀兼程趨事。乃初二晨起。水已徧于街衢。男婦老稚。攜筐篋而逃竄者。已載道矣。則移寓高阜。不一日。高阜之寓。水復浸淫而至。恐復不免。則求附運艘。幾有性命之憂。初五日。水勢稍定。乃附舟至天津。舟中有揚州運軍云。於二十九日。于河西務見有二喪舟。乃南艘相竝偕行。其爲公與吳江周公之舟無疑。噫。喪舟而寫稍爲我待。不二日文已至矣。初六日。從天津附往德州之舟。水勢逆甚。竟日不能二舍。十一日復登陸。十二薄暮。至吳橋別范公。蓋意喪舟過桑園。必入問范公。范公必爲我留。不虞音信之杳然也。甫及門。知范公聞訃之日。正欲開宴。一閱邸報。不勝痛爲徹宴抱疴者累日。人謁相對揮淚。且稽首稱謝。文不勝惶遽慙愧。曰。文不得視含。大負周公。乃公之罪人。反加禮耶。因告公以前金下落。且悉周氏之艱難。及鹿公之逋負。意欲公俟金至。稍割以償鹿公。公於文一語。一爲悽然。知其于此金必有所助。十三早。仲昌來晤。文以情懇之。曰。前金旦晚且至。質翁大有割助意。而鹿公轉貸尙有一百五十未償。倘得隨公之所樂助者。卽以償鹿公甚便。兄其爲我圖之。仲昌曰。兩家之物。皆出于貸。鹿公欲償貸。則吾公亦欲償貸。恐必不得之數。惟是直捐以助周氏所樂從耳。文大爲首肯。是日赴公飯。未半。鹿使二人已齋金至矣。飯畢。別出。鹿使納金。公不納。而亟召文。欲盡付持歸。文局促曰。周固不足。公非有餘。稍割則可。其可全捐。而以此重逋爲公累耶。公蹙額泫然曰。所處固不足。然弟幸有此身在。猶易處耳。文曰。公言至此。不敢辭矣。但二百金數不爲少。長途或有他虞。親齋斷乎不可。公其別致。公乃止。初文之爲水阻道也。深悔奚弗從陸

取道良鄉涿州。便可刻期至桑園候舟。胡乃自爲水苦。詢鹿使以孫兄出京光景。始知孫一出京。至蘆溝。民居已漂沒殆盡。沈浮五日。始達江村。主僕三人。幾于不免。噫。斯行也。伊誰之事。而乃以累孫兄至此乎。而文之得免于難。不可謂非倖。鹿使之來。璧范金者。其一人仍昔之趙老家幹也。往返於京者凡三。往返于吳橋者凡兩。屈指程途三千有餘。矧炎月尤爲不易。前者區區一金。何足少酬其勞哉。十四日入別。范公眷眷。一飮再飮。不能爲別。濱行文再拜稽首。公起執文之手曰。弟亦有四叩欲申。叩曰。弟相去數千里。徒有其心。不能爲力。兄與咫尺。周氏諸孤。所望朝夕一顧。文爲泥首受命曰。綿力所及。其敢自愛。噫。范公子友誼。真千古一人耳。流盼曩者。將命之趙使。見其形容骨立。詢何以至此。則以疇昔東光之行。刻期報命。爲中途暑雨所中。方爾抱瘡。斯行也。不獨諸君子竭其心思。卽諸君子之僕從。亦殫其筋力。眞足爲友道光。別出范公以前。二金爲贖。文乃不敢復辭。使者復傳公命曰。所處二百金。旣不持去。不得不一歸原主。倘收當再爲設處。蓋金非己物。公自有微機焉。非有他也是。日原擬登途。而日已昃。騎且無可問矣。仲呂用舟。各治具強遊。公之小築。以一解文之悲哀。然杯在手而痛在心。時時彈淚。殊不成歡。而別十五日。發足。是時妄意喪舟。經聞必有稽留。且從此至分水龍王。水勢俱逆。而我以騎往。必可追及。則爲策蹇而馳。十六至荏平。是夕復大雨如傾。水復阻道。不可行。留荏平者兩日。十八發足。每行不數里。非深泥則巨浸。稍淺則以騎代舟。稍深便以足代騎。裸形匍匐。嘗此一番生平未嘗之苦。卽欲求如曩者之行。僅止于炎熱。又不可得矣。又每作三韓被難想。於滔滔中如乘安車。如坐夏屋。忘其爲困頓也。此一想。又眞一貼。

道遙散哉。自吳橋發足以來。馳驅跋涉中。念范公之金。一歸原主。或不能如其前數。又念吾公之家。舖糜不給。焚燹諸孤。以養以教。以婚以嫁。良非易事。目前賊金雖急。然當人心哀痛之際。自能勉強竣事。必不至累其孤寡。獨是日後教育等事。大屬難處。雖吾蘇好義者不少。然當此兩番大助之後。豈堪再助。卽有金石椒蘭。如文姚太史諸君子。均非有餘之家。豈能種種仰給。此年年苦楚。事事艱難之局。而子姓失學。併失其先人故步之根也。賢者之後。以空乏二字固其窮者。幾人必得置一恆產。乃爲永遠計。前金二百。儘足爲一頃謀。而讀范公所惠。竅議諸書。見公于宦遊。每遇凡可經久事。不遺餘力。閒有捐已俸爲之者。則斯議也。惟公可告。乃以前意作柬。從逆旅主人寄范公。二十二日。至濟寧。詢之閘上。則喪舟又已過矣。沿途阻礙。使文不得登舟一護。少盡其心。何天之阨我。至是日。遇公使周成。自南而北。與之登舟偕歸。三十日。舟泊黃河。一夕中盜之來劫者三。幸客衆豫防。不能登舟而止。因自幸范公之金。堅辭不攜。不爲過計。七月初一。登內河之舟。是日午餘。颶風大作。幾爲之覆。倘在黃河。寧免于難。幸矣。幸矣。已而聞是日。吾蘇風更甚。數百年合抱之木。有爲平折拔去者。不可勝數。蓋公柩至蘇之第三日也。天怒激發所致。曷其然乎。初二復爲颶風停舟。初九抵暮。至吾公家。登其堂。不見其人。初十日。憑公之棺而哭。不獨痛公之死。蓋痛公死而不得視合。公則大有造于先慈之苦節。文則無毫毛之益于吾公之死也。諸公子方遵曩日。吾公之命。以伯相呼。爲再四辭謝。雖諸公子奉公命相稱如故。然于文。祇重其愆。所謂耳受而神實不受者也。是日歸家。幸得舉家無恙。而病子呻吟于牀。然阿翁已歸。自足相慰。乃僅聚首百日而亡。痛哉。諸

兒爲述閏月二十八日之更深。有鬼嘯于庭者三。其聲甚厲。意周公之喪已歸。詰朝往詢公柩。果子是夕至家。公實相報。有何疑焉。十三日以一杯哭公。而詳在京之事。名九京報命。復之吾公。隨以資斧三十金。費數。交公之子子佩兒。且言范公當有後訊。八月二十二日。范公使者齋奠十金。至蘇。發函。深是文恆產之說。約以明春付金。因聞王中丞之金業已收去。念范公囊中甚窘。乃致書李仲昌。囑于中丞處從與其閒。蓋仲昌與中丞爲椒蘭之好耳。或謂范公此金。異日卽以清鹿公於計甚便。噫。文旣倡恆產之說。而范公慨然以爲己任。則此金者。乃范公爲周氏諸孤長久計者也。若鹿公之金。定當另爲區處耳。豈可以游移其閒。以負兩公意哉。譜至此。而北行之事畢矣。噫。公之被逮也。萬姓爲之號呼。至捍法網。喪其元而不顧。公之就獄也。天地爲之震怒。奇災異變。先後疊見。夫豈細故。公之已沒也。洪水滔天于京師。大風刮地于桑梓。爲百年未有之災。天人之際。一至于此。則公之爲公何如。乃痛公之深者。或以等死耳。奚弗自裁于蘇。乃多此緹騎贓金之費。而投其身于至慘之地。噫。公何人乎。冝泯泯而死。自同於匹夫匹婦之經溝瀆者乎。故關真君之籤兆。每爲勸駕。非不靈也。正欲公之烈烈而死。以奇節與公也。此豈尋常所能測哉。乃若吾公聞逮之詰朝。囊中所存白鏹。不能一兩。以三錢奠貧。交徐亂開。以二錢買桐油爲繼晷資。謂其價稍廉耳。以燈火之需。而計及于此。其家之貧可知。比晚聞逮。所付公子之金。僅四錢耳。問糊口之產。僅半頃之污萊。問棲身之所。僅數椽之陋室。五年司理。數年銓部。而光景若斯。吏之廉。未有如公者。乃能償贓金三千耶。藉非吾公之品。吾蘇之義。則公之孤寡。有爲贓金立斃耳。斯民自有直道。千載自有公。

評可不具論。聞吾公爲獄吏拷掠時。見其刑酷甚。則高聲呼曰。爾不畏天地耶。柰何必欲處吾輩以死。且天下忠臣義士多矣。從來翻日後之案者。正不屬目前之所忌也。非謂吾輩死而天下遂斷忠義之脈也。公所謂教之誨之者。實在斯言乎。且捶且詈。愈折愈奮。被逮諸公。無能比其烈者。噫。味斯言。一時挺然不屈之光景。又豈見聞可得一二哉。猶記公公署候行。燈下朗吟于忠肅公粉骨碎身渾不怕。獨留清白在人間。及楊忠愍公風吹枷鎖滿城香。諸詩津津有味乎其吟之。神若爲之彌壯。氣若爲之彌揚者。公于臨難激烈乃爾。豈非真正奇男子。壯哉壯哉。公之構禍。固由于與廓翁聯姻一事。而倪文煥首逢璫惡。後更有陰爲之構者。然聞緹騎之逮廓翁。廓翁飲之虎阜。緹騎且從虎阜解維。廓翁爲聯姻一事。欲姑爲一日留。緹騎難之。公大叱緹騎。而且語侵魏賊。復曰。若其直致我語。余非畏死之人。噫。撩虎頭。履虎尾矣。奇禍之至。何怪其然。非吾公斷無此膽。聞公于被逮之夕。縣令守于廳。妻孥哭于室。公拜辭家廟。從容取筆。爲僧題小雲棲額。此其神情之定。何如不死于蘇。死于都。真知所以處死者矣。吾公之抵京也。以四月之二十四日。公之入獄也。以是月之二十八日。未入獄前。處東司房。彼時諸縉紳無一人敢至。而諸旗則左右惟謹。蓋諸旗中途聞京師以其需索激變。將如周繆兩家。追比詐金。曾於驛中密室環跪。以前金完璧。公則仍以授之。誓不洩一言。故感激若斯耳。二十八日。另有一旨。開讀。開讀畢。裸形加綁。以解理刑。一至理刑。彼時卽公隨身之僕。俱不克覩矣。聞公于理刑陳詞侃侃。聲振一堂。撻棍四十。繼之以夾。水火棍六十。又繼之以拶。參梭一百二十。誣坐贓金二千兩。續奉嚴旨。五月初。又加以夾。復誣贓銀一千。公至此不死。

者亦幾希矣。續有非常天變。刑爲之停。比至六月初旬。又撻十棍。數雖少而慘更甚。十六公猶強。餽十七子丑之際。不知用何物鎮壓。公首而亡。動手者則鎖頭顏紫也。聞楊左諸公之死。皆出此人手。願逸每日送餽。輿獄卒頗狎。故得其情實。乃爾不敢不詳誌。以記彼時之慘毒。公之德容。曩公堅不欲寫。有公門弟子龔兄名汝虬者。知不可明告。卽於候逮之十七日。私攜丹青。看王明谷。從傍私窺。圖公貌藏之。其肖特甚。不惟俾公之子若孫有所瞻依。且使吾公之容。異日與諸名公之像。共垂不朽。俾後人有所寄其高山仰止之思。亦似有天意。此皆吾公之事。所應備記。故謹附錄于此。是役也。鋪堂一事。全賴巖叟顧公。與所出往返書札。爲給事足吾陸公。而京師斂金。實惟念陽徐公。當其時。縉紳先生。靡不以公爲諱。不敢齒及。徐公獨奮身綜理。而且侃侃于張侍御爲公之子。力爭民變之事。今日徐公之削奪所自來也。若文一人。既不敢及顧徐兩公之門。非得士衡轉達其間。更從中爲之料理。則文有束手無措而已。赤日中往來長安道上。分憂共戚。士衡一人耳。乃若盡吾朱君。雖艱于文之一宿。然非朱君安所得查君。以爲出納之地。查君者。以太學待選于京者也。司此一項之金。太非易事。而查君能任之。非獨千金之託。毫無所負已也。吾公之僕。自顧選而外。則有唐元。特爲贓金一事。銜命而歸。溽暑中四十餘日。往還六千餘里。視後使周成。幾兩月而纔返半道。勞乎不勞乎。嚴秀偕文出入。其勞可知。而錢眞者。雖多所不便于文。然遍叩諸公之門。及入獄比納。亦勞之不可泯者。此俱北行之譜。所應紀也。乃若吾蘇斂金。實惟光祿卿具茨毛公。與異度文起。孟長德升諸君子。文之遣唐元歸蘇而索金也。屈指往二十日。來二十日。斂金十日。尙虞不能。

及數。乃元以端陽日從涿州歸于六月十六日。已持千金之票至矣。又十日念陽徐公使者。又齋有五百金之票至矣。是時有原齋會票五百金。京中縉紳所助五百金。范鹿二公處有五百三十金。已有一千六百。而得此兩項之金。且浮三千之數。倘其時而無必欲死公者。完賊之日。送刑部擬罪。明旨昭昭也。六月終旬。自足了局。諸君子寧不大有造于吾公。聞文先生之言曰。明知賊之完否。初無救于吾公之死生。但公倘爲追賊而死。則吾輩之痛。更莫能自解耳。然當緹騎之至也。所處已二千金。茲復處幾有二千。吾蘇之好義亦已至矣。苟非公家赤貧。真無可質當。無可變賣。絲絲取必于助。亦安能感動如此哉。被逮之始。縉紳與諸好義者。爭爲助。諸貧士則請以本府季試三學諸生例得賞金全捐爲助。而諸廩于學宮者。則請各捐一金爲助。一時好義光景可知。而彼時司出納者。實惟楊兄名大濼。暨張兄名城。當民變後。人俱畏禍。至有前曾出金。而亟求削名助籍者。而張兄能以爲己任。不避嫌勦。若爲公而死者。實惟顏佩章。楊念如。周文元。馬傑。沈揚等五人。聞佩章念如臨刑。了無難色。挺然曰。我爲清官死。死有餘榮。寇公祖。慎名

·陝

西人陳父母。名文瑞。福。建同安人。

俱爲流涕。陳父母者。老于諸生中。公爲司理。特拔之。進棘闈。因以門弟子自居。公

之被逮。左右周旋實。惟寇公與陳公是賴。非兩公。恐即欲赴闕。未可必矣。蓋當時人情危懼。當事者惴惴以公爲釁府。既恐爲旦夕之留。又恐速目前之禍。惟有支吾觀望。以冀一時之無事而已。委婉調停。惟兩公是賴。至于吾蘇之禍。止及吾民。而士類獲免。止于降黜。則或云票出安慶相公。然亦非人力所及。蓋以天變不畏之瑞。而此時亦若有惴心。稍委閣票處分者。豈非天哉。凡吾蘇士民親友。爲吾公奔走捐助者。

不能盡記。如公姻婭之殷。汝劼介文交吾公者。以此舉幾破其家。而密交鄒虛王。辭他館課其諸子。則雖不北行。賢于北行也。文故紀北行而及之。至文棲遲定興。吳橋閒。爲鹿爲孫。爲范。數公家範。更有可言者。鹿公之封翁。爲成字公。恂恂篤行。惟知誦法孔子。別無淫祀。子旣職方。孫復發解。而身尙課農。朝夕靡倦。居然有伐檀氏之風。聞公壯年。公之父方持斧吳中。而公以青衿家居時。躬親負擔。以饁耕耘。以故家之僕從。無非田夫。求一布衣鮮整之僕。不可得也。而肝膽更甚昔。魏廓翁以大行人至其家求識公。而公以我老儒而彼縉紳。縉紳交自有吾子。何與我事。堅辭不出。比廓翁被逮。魏公子持蓼翁八行投職方。職方方經理榆關。公得書曰。此吾子之友也。可以吾子不在辭乎。遂身爲居停。每對食。見魏公子泣。則不勝傷。時吐其餽。至欲質產爲助。又聞公艾年喪偶。終身不再娶。門庭肅然。職方氏年方五十有二。而鬢鬢皓如。與封翁幾若伯仲。蓋以急友之難。一夕而白。同榜中吾公。卽與定交在此。急吾公之急。化無爲有。肝膽所不必言。親朋四出。問金而相對不輕齒。及以故其僕從。寂無知者。比范公金至。方求公命。使促孫啓美。兄公已先期命人往矣。作事之密。趨事之敏。亦可窺見其微。子孝廉公仁卿。惟知下帷。門外之事。卽試事亦不一。與其父子祖孫閒。眞令人相視醉心。師法不遑也。孫公齡十七。領鄉薦。已爲孝廉二十七年。而四壁蕭然。一無所有。昆季四人。每食必聚。更相僕從。疏食菜羹。陶然自得。忘其爲貧也。文初謁公。與公竝騎而行。將至。公下騎步趨。文謂已至耳。不知乃道經其尊公墓也。因爲訪其疇昔廬墓之所。併讀諸君子咏其廬墓之章。宛然孝思。令人傷感。如公者。孝廉二字。眞不媿哉。而其兩兄一弟。俱篤行君子。弟卽啓美兄。奔

走吾公之事者也。若范公者，高義所不必言。時其太尊人宦遊，而太夫人在堂，朝夕往朝，不啻嬰兒之慕聞曩者，太尊人爲湖州別駕，偶抱疴，報至時，方娶媳，吉事未畢，卽刻疾馳，不八日，已至湖。蓋一日夜馳三百里也。延明師于別業，課其族人，雅有文正之風。師卽用舟康先生，古人也。已登明經薦，而甘苦督課，居然寒儒。康有二子，彬彬謙恭。次子諸生，乃儒其冠。長子尙未泮遊，則冠齊民之冠。文登其堂，爲之留飲。其子掃除擎捧，惟恐不及。文再四爲設坐，阿翁弗許也。而仲昌李兄，一種奇特之氣，英英逼人。吾公之未沒也，則慷慨相期。吾公之已沒也，則悲歌相卹。披肝瀝膽，把臂慇懃。卽肉骨不啻。以上諸君，皆夢寐勿諼，而恍然在目者。故特爲之附及。乃有吾蘇鐵賈張全倫，晉人也。彼未嘗沐公之恩，而第感公之知。吾公之逮，亦捐助十金。又惓惓爲諸公子計曰：公子年少，非得疇昔父執諸君子爲之主持，不可事期必行。言期必聽，乃克有濟。乃克無負清白吏子孫。噫，斯言也，斯念也，而發于晉之賈人。雖數君子金石之誼，必繇斯轍。然旁觀一種議論，自不可少。倘諸君子而計及於此，則公之諸孤，旣爲大賢之苗裔，又得衆正之夾輔，必且儼然成其爲道器。疇謂公死乎？疇謂公死乎？紀北而終之，以此所望于諸君相成之誼，匪淺哉。

書

蓼洲周先生書

廓翁事已付之一痛矣。翁兄生死交情。眼中未見其兩。感極。容面時悉之。築室將成。弟已作避世計。知亦有道者之所深許也。不盡。

傷哉此周先生手書也。先君云。于都中尚有數楮。幾爲邏卒所獲。悉已火之。止存斯柬。乃先君爲魏先生後事所寄者。不數日而先生亦被逮。頃簡笥中讀之。涕下。謹錄首端。以識愴感。

湛持文先生書

讀手譜。當日情形了然。可作他時信史。使人誦義無窮。彼以不及視。合爲兄遺憾者。不知其閒無數委曲耳。飲冰吞炭。冷煖自知。惟有腸痛。弟憂患餘生。復多疾疢。閉門戢影。不知作何稅駕也。原稿奉上。祕之篋笥。留爲金蘭譜中一段苦海耳。

又

子佩雖當入都。恐無同之者。未可遽行。尊諭動呈之說極當。但今當事諸公。謹畏太過。鄉紳又鮮慷慨激發者。所恃天子神聖。遠駕堯舜。前敕諭有褻恤贈廕諸語。此時當有處分矣。贈諡祠廕。四者缺一不可。然固非一時一人能辦也。道體久病。此時須萬念放下。乃稱善攝。吾輩後死之任。必無少怠。幸勿注念。以耗

精神參價一兩奉上。空囊殊媿菲襲。希亮希亮。

現聞姚先生書

初意日譜迺吾丈自敘生平耳。不知其爲亡友北行事也。披緘盥手焚香。卒讀不禁泫然。此兄受奇禍。惜其不能效忠愍公。就樞牀上作年譜。而吾丈代爲之。他年信史。寧不以此爲左證。至於周旋險阻。生死共之。古人中寧復多得。友道如土。卽涼燠輒爲改念。況於安危。賴吾丈手綰而肩維之。真狂瀾一柱。若弟輩惟有自媿自嘆而已。其與鹿乾老措處者。洵不可負。弟輩業已心識之。來稿謹肅使馳納。一片表意。少佐藥餌。幸百惟珍重是禱。

又

累承手教。因入鄉營葬。不能速答爲辜。聖明在御。沈寃欲洗。伏闕上書。此其時矣。但上疏後。必得都門有大力者爲之照應。方得如意。今所仗者一聖君耳。若在廷諸臣。猶昔日也。子佩子身而往。孱然書生。有闕難叫。故鄙意與同志者商之。必得拔茅有機。方可挾以俱往。目下恤典。自有公論。若補其所未備。不妨徐圖之。至于三學。公呈求當事代題。丈試觀今之當事者。果其人否耶。前日毀祠毀像。不肖欲取煨燼之餘。以告蓼兄之靈。而府公尙斷斷不可。況有進于此者乎。知丈熱腸如火。姑少待之。吾輩後死之責。正有在也。前所致范質老書。不敢深促。恐其以此爲歉。但有書寄鹿乾老。則以重擔累之。殊切不安。或徐而爲之計耳。至丈所寄兩書。仍在張業師奚囊中。弟未嘗取歸也。蓼兄像得其髣髴。覽之痛絕。尙未忍捉筆題像。

仍奉納。尊體未痊。尙慎攝自愛。楊云云。中心藏之。
文姚兩先生。昔許題詞。今在都門。遂以當弁語。

質公范先生書

自黑氣一道飛集貫索。而天地震怒。四海鼎沸。凡在同志。能不倍切沈痛。自傷僻蹤。在遠一介。無聞臂指。莫効。空負鬚眉。誦良朋永嘆之詩。爲慨然太息。門下左右周旋。不避艱險。嶽嶽高義。眞足千古矣。聖明在宥。詎宜有此過舉。然非有此。何見至人肝膽。從來忠臣義士。時窮乃顯。天未始無意也。然使朋友一倫。不至獨輕于世。此所維係甚大。不佞私心佩服。匪止急難之誼而已也。數日晤對。仰見一往意氣。令人心折。歲寒深盟。從此始終。以之皦日在上。無忘此言云云。拮据累日。東貸西借。有類持鉢。僅得如許。薄俗悠悠。視貴鄉咄嗟鑿金。眞當愧死矣。入定興更得何等消息。顛望好音。目斷神搖。銀二百兩。計五封。希灼入。

又

嘗讀睦書。至李固之郭亮。陳蕃之朱震。孔融之習脂。慨然想慕。以爲今無其人。不意于門下見之。當此世道交喪。得一人維持。交道可以不孤。一段氣誼。獨存天壤間。亡友之銜結。又其次矣。別後倘悅。累日不能爲懷。計期此時。門下已抵里門矣。渠家能存立否。官銀有著落否。門下一到。事事經紀。諸子無父。有交。周兄雖亡。不亡矣。思生死之交。門下當其難者。我輩地遠。力難相及。苟有可効。不惜踵頂。走使往看。幸委曲見示好從事也。文老一種肝腸。深用敬服。不避未同一書致謝。幸惟有以先之。令郎清恙。想已霍然。阿膠

一封奉用。他不能有所寄將也。台丈平日行事。可臚列數則見教否。南羽不乏。冀有嗣音。

又

方欲遣使。而濟寧人到。忽接手書。委曲籌畫。深服有心人之爲計。周而慮深遠也。前物門下。旣不冝攜。只得暫還原主。續致使覺甚難。王中丞處。聽其自行捐助。未敢掠美市恩。正在勉強湊處。聞見書暫止。先走价請教。恆產之置。不佞以身任之。交價卽明春不遲乎。台丈一面安慰其家。一面爲之訪問。必期得當。以爲久計。諸子督課無人。恐致失學。門下且以師分臨之。讀書作人。萬萬不失。并其家事。亦便料理。若文字則閒送文姚二公處一看。似極妙著數也。但須十分省約。十分攻苦。以感天心。而待天定。善人之後。安有不昌者。始之終之。惟台丈一人造之矣。一書致奠。乞遣使指往。若誅章則尙有待耳。

又

數數奉書。具悉近狀。知以清恙爲苦。中心懸念不能已。已久欲遣使馳候起居。因爲先慈歸藏計。拮据年餘。心血都嘔。冬抵乃畢。窳窳而體病遂不可支矣。日日負上荒丘。百念灰冷。所不能了者。惟有前議。宵寐以之難置。諸懷但大事之後。不免再行稱貸。錢某旣以未周不便開口。且竊議我以當官不能作家。舉爲笑柄。卽游宦者。又有形迹之嫌。更曰自居于清。何以濁待我。所以更難更苦。盡力搜括。得九十金。又邀同人王惹嶽中丞五十兩。張蓬元司馬。李性參憲副各三十兩。此皆海內正人。不佞同志。咸忻然樂助者。端使奉上。以卹周公子。門下查收產便卽以付之。不便仍存貯以待。勿使零星花費也。遙念門下周旋覆巢。

之家。不知費多少籌畫。塾師得人。日用粗遣。皆翁兄明賜。不佞以爲天生偉人。俱足補世界闕陷處。非謬也。新君登極。掖肘大奸。旣已除翦。朝端漸有清明氣象。私意諸賢子孫。政當爲叩關之舉。高明必有定見。自無待不佞言也。尊恙勞而兼鬱。多方調攝。以輔聖朝。爲祝。

乾岳鹿先生書

別後。兩從吳橋使讀仁兄所寄。而其人。有來無往。不佞無由附報章。此番乃得從張異度兄手。以佈積悃。夫前爲蓼洲年兄貸事。不佞原以身任之。仁兄自京遺來之券。不佞已卽時火之。周氏諸孤。旣驚覆巢。復苦立壁。豈有割饔殮以償前事。必拒不佞於蘭籍外。不使得効一毛於緩急之數哉。仁兄過執。不必然之小信。而未暇爲不佞地。今以後願勿再提。只以弟情告於蓼洲兄。前以百五十金。當不佞千里之束芻。則仁兄之相諒相愛者至矣。孟長兄有字。亦以此語爲報。仁兄欲自爲信。當容不佞使勉爲義。不佞得自附於義。而仁兄之信自在。積悃萬縷。未遑詳布。先以緊關之情奉復。計此紙得達。而仁兄清恙已愈多時。天相吉人。自當勿藥。

仁卿鹿先生書

憶自丙寅言別。見翁兄悲憤成病。私恐難涉長途。深以爲念。後從范質翁年伯處。知抵里門。且接手書。始慰遠懷也。嗟乎。誰非朋友。臨難始見交情。翁兄護壘客于危途。逐忠魂于歸棹。若茲肝膽。何必遠慕古人哉。聖人臨御。正氣大神。卹錄明綸。輝流黃壤。翁兄追死念生。更當破啼爲笑矣。春初入都。晤異度先生。再

接華函。三載離懷。恍焉如對。獨是翰教諄諄。恨前約之未結。則甚不必也。夫當日事急稱貸。家君已身任其償。卽未明言。盡以相助。固心許之矣。周年伯後事雖完。而伯母世兄卽舉火之需。尙須區算。安得贏餘。復償此項。寒家雖空囊羞澀。然薄田數頃。歲可稍出其息。節次完之。幸留得此身。其餘皆易處事耳。翁兄前件。便從今日勾銷。無勞再以為念也。已與異度先生言之。煩致之諸君子。家君尙有一牘續寄。偶因南鴻之便。先附此函。聞道體久病。尤宜自珍。握手何時。不勝悵然。

譜中范公產金鹿公貸金為先君未了之願。垂暝不忘者。其自范公第四東。及鹿公橋梓東。咸先君蓋棺後所來。痛未及見。梓之以竟前事。併識高誼云。

壽陽謹識。

跋

嗚呼。此先君從難次第北行之事。父執諸公讀之。泣下者也。周先生建忠抗節。忠愍公後一人。被逮開讀。郡人士奮迅感慨。哭聲震天。而匹夫慕義。視死如歸者五。直道不亡。眞足褫大慙之魄。而伸忠孝之氣。願當事者。忿嫉益甚。鍛鍊之謀。益以刻深。當斯時也。岌岌殆哉。先君獨毅然從先生往。戚友無不重爲惴恐。屹不爲動。周先生嚴氣正性。覆折而逾堅。旣以完節高千古。而先君以一身周旋其間。臨難不懼。知無不爲。遂至病中肺腑。慷慨矢曰。公舍我死。我何用生爲。欲伏闕爲公鳴冤。念徒死無裨。且公以先人葬事見託。諸公子後事。百未及一圖。無以瞑公目。姑後死以了公事。故于九京報命。書有云。不久且當從公地下。隨以窀穸商之桑梓。諸公恆產謀之吳橋范公。延師肄業。則任之舊西席鄒虛王先生。事差有緒。而先君病日重矣。血時嘔矣。裹疾以竟斯譜。謂公忠孝大節。日月常鮮。至於從容就義。威武不屈之概。非此不悉。且諸公急難之誼。有不徒付之永歎者。咸於斯可考焉。譜成。遇聖天子臨御。乾坤重闢。喜曰。不圖垂瞑尙及見茲。伏牀北叩。誦聖明。迨易簣之辰。猶呼壽陽扶掖。手書上文姚兩先生。促叩閻洗冤。急表忠魂曰。今而後。吾有以謝良友矣。投筆而逝。無一語及家事。嗚呼痛哉。先君砥礪廉隅。以名教爲己任。生平大行。更僕未易數。壽陽另當詳述。用乞大君子一言。以垂不朽。獨計斯譜。周先生殺身成仁之義。樂天知命之誠。披覽如見。情形不隔。尤先君沒世苦心所寄。今周先生誼動聖主。特表清忠。而先君見背。忽已二祀。士無

賢不肖不沒其親之志。各有同懷。欲先鐫斯譜。徧呈鉅公。竊愧蕭然不能剗。矧異翁張先生慨然任曰。此爾先人一段精誠。其可泯滅乎。疏諸好義。自兩如顧先生始。而維斗天如吉士諸兄。咸從同社。糾金克成。是集。此皆張先生好義之倡。而諸君子聲氣之應也。中心藏之。何日忘之。先君於理學經濟諸書。纂述百種。不肖所以有靦面目。每生于世者。以懸黎有待。未成厥志耳。罪人哉。

不肖男壽陽增百拜謹跋。



楊公政績紀

附楊公本傳

黃家遴編

楊公政績紀

本館據學海類編
本排印初編各叢
書僅有此本

楊公本傳

楊繼宗字承芳。陽城人。天順元年。以進士授刑部主事。當有提牢之役。洗刷桎梏。時飲食櫛沐。善視之。囚悉生全。不如向者困瀾穢死。會廷議推擇守郡。王翱以名薦。出爲嘉興知府。至則興學勸士。閔農賑災。民有以事來。前好問之。郡中豪奸馴良。與有所疾苦。盡得其實。其于豪奸。立見鋤治。顧有悔改。亦不深督。其所疾苦。調劑興革。不出旬時。旣才傑。復出。又意氣豪邁。大吏要勢。有所怙挾。悉憚其威。時有清軍孔御史者。凌抑有司。撻里胥。數至死。繼宗出教曰。有被孔御史酷撻死者。來言于太守。御史無如繼宗何。酷如故。繼宗入告曰。治貴識體。公清軍也。何與里胥事。御史臨行。突入繼宗府中。繼宗引御史入臥室。空空耳。衣一篋。悉發篋示御史。御史嘆服去。時內臣用事。旁午入江南。至郡要索賄賂。第與菱藕。歷日而已。內臣好言曰。幸語太守。無所用此。太守有金錢好紬絹。幸及我。繼宗出庫金送曰。金錢在此。卽市好紬絹。且亦具有。第此庫中物。幸太監付一印券。令他日可磨勘者。內臣大驚。遂出金鈔還之。繼宗入覲。江直欲一見之。殊不往見。江直言于上曰。天下官不要錢者。惟楊繼宗一人。繼宗知嘉興九年。士民感化。奸暴革心。訟平賦均。風清弊絕。御史楊琅奏聞。得旌異。超遷浙江按察使。每朔望會僚佐。指天誓衣冠受賄。不還故里。南有錢塘。北有楊子。異時藩臬費用。取辦和買。鎮守太監日供當萬錢。繼宗悉裁罷之。市舶太監積不能平。因宴會令諸官各自言畏與不畏。繼宗倡言曰。最所畏者臟穢。最所不畏者內臣鎮守。內臣有兄在司禮。

時時言繼宗于司禮。司禮于上前中傷之。上曰：得非不要錢楊繼宗乎？司禮遺鎮守書曰：善遇之。上知其
人矣。一日方坐堂聽政。母訃至。立解印。雞斯跳哭出。止驛亭下。蒼頭卷衣數襲。挾律書數冊而已。服除。以
僉都御史巡撫順天。繼宗直氣廉聲聞天下。居常以包拯自居。乃其爲人辨別黑白。言論亢激。其節目疏
闊。遠于情人。時時對人言罵臧官不絕口。有事至其境者。輒使人沿塗伺察之。方其以按察使入覲。見藩
司官緘遺禮物。輒挾使列名。俱有重囚任意放遣焉。及其巡撫順天。悉奪戚畹所占民田還民。戚畹皆怨。
會順天治中陳翼者。來見繼宗。繼宗累拒不納。及得見。復不爲禮。于是翼奏繼宗治官失大臣體。下刑部。
遣官勘問。有旨責繼宗偏忤。調除外任。得雲南按察副使。是爲成化二十一年。繼宗平昔官次自侍一老
蒼頭。朝夕飯兩盂。蔬兩豆耳。及按察雲南。單車之官。并老蒼頭亦去之。宏治元年。陞湖廣按察使。再陞僉
都御史。巡撫雲南。竟卒于雲南。羅倫論一時剛德。以繼宗與王竑。御使謝元吉。僉事陳騏竝稱。騏字夢祥。
南海人。少爲醫生。有司使入獄中視重囚。穢不能忍。恥之。乃學舉子業。登天順進士。歷江西按察僉事。以
藥活病民。出冤獄。清虛賦。修學政。悉毀淫祠。民呼爲陳打鬼。遷雲南副使。時鎮守太監錢甯家人不法。每
爲騏所制。被中傷落職。

楊公政績紀

清 中憲大夫知嘉興府事三韓黃家遴編

嘉興俗嗜鬪。輒壓溺小兒以誣人。公時加曉諭。犯者必反坐如律。若毀其襍物而有所詐。仍取追償之。土豪張某。窩聚盜賊。大結權貴張威勢。一日劫桐鄉起解官絹。公縛寘法。會當道行郡。爲張解曰。無原告。公曰。知府朝廷民牧也。張所盜者官絹。請以朝廷爲失主。楊某爲原告。有張昇者。父子兄弟號四凶。事發則以賂免。公召語之曰。汝輩爲惡日久。當改過也。後犯罪。賂臬司欲脫之。公不從。父子俱寘極刑。民歌曰。虎死害除。其樂何如。有富民女已受聘。後惡其貧。欲背約。誣告婿。公佯曰。爾欲悔親。當以百金爲罰。富者聽命。既得金。召婿若女。卽日爲婚。以所罰金畀之曰。爾患婿貧。今有百金可贍女矣。後婿家豐裕。其人益感之。屬邑有孤子王得兒。生七歲。父母早歿。家甚富。族人利其有。將陰害之。公聞之。以其家費貯庫。長而有室。乃出還之。千戶沈禎。項襄毅之婿。怙勢爲惡。公每升堂。僉一白牌。令吏立府橋呼曰。告沈禎者入。其父子青衣小帽當府門跪伏。幾有月餘。其狀百餘。俱未有重情。乃徐召其父子入諭之曰。吾與汝改過爲善。保爾身家。密將其詞粘連爲卷。封識一木桶中。秩滿。臨行付架閣科收貯。詔府吏曰。自後嘉興有大事。方啓此桶。人不以爲意。公去。禎勢益張。未幾項落職。因東廠訪得禎惡狀。朝廷遣法司按治。將抄沒其家。監察御史呂公鍾。責府縣禎爲惡。卷案無得一老吏。忽念曰。楊公行時留此桶。試啓觀之。乃卷案一封。上批

曰。權豪勢要之家。郡官束手難行。日後充軍。充軍乃禎爲惡事也。送入察院。呂公見而歎曰。楊先生神人也。卽依擬編禎遼東軍。後宥回。前此鄉人欲爲公立廟。禎子輪首出工費。且曰。吾家向無公在。必無所顧忌。後來必抄沒矣。今得全家。是公賜也。生員汪頤墓田。與豪右相界。欲兼併不得。遂誣以不法事。比提學按郡試。諸生唱名。獨不及。頤公問焉。提學曰。有發頤過惡者。將黜之。公曰。頤在學。有文行。必以地界故爲仇家所訐耳。請視其狀。果然。遂得白。郡民有懷悅者。家富有善行。公每保全之。旣滿去。悅子生員沐送至蘇。公諭之曰。財者累也。我去汝家。亦自此多事矣。汝當策勵持門戶。後果有以軍事誣懷者。家竟落。秀水民周可立。公嘗見而識之。未幾以罪匿。捕之弗得。後數年。更名立。復充老人。以鄉民違法事呈公。公曰。爾非周可立乎。吾求汝數載不獲。今以違法告人耶。若違法則莫如爾者。周股栗服罪。公每事自斷。吏肯不得售其奸。公餘惟課寫。做讀書。講解律義。賓興之年。吏胥亦有試場屋者。鄉士大夫素服公。剛介。不敢以私囑。然遇祝賀期。雖龍鍾老疾者。扶筇而至。當隆冬時。禮畢。則熾爐圍坐。款以酒數行。不至者。必使人問之。自是舉行大禮。肅然如在朝廷焉。待郡邑學官。悉優以賓禮。賓興宴。必列學官上坐。曰。吾爲郡父母。諸君則教吾子弟者也。可與屬官班哉。其有倦教。則亦譙讓之。曰。有司廢法貪墨。害止一時。然未嘗不受天道之報。學官不能盡心教人。致誤人家子弟。不可言天道報應。他日又將何如耶。臨春秋大祭。品物豐潔。尤極誠敬。齋宿必拉僚佐。處于郡之慶嘉亭。其他郡厲之祀。恭恪亦不少替。旣至壇。親品嘗之。自奉粗糲。至鄉飲賓興之宴。則務豐腆。若出二人。其居家也亦然。田宅無增于舊。祠堂墳墓祭器之屬。則極嚴謹。精

潔凡義夫節婦孝子順孫之類。必廉訪之。雖未合奏旌者。亦必親過其廬。使民知爲善之榮。重禁博奕博蒲之具。人不得鬻。而娼禁尤嚴。至于符籙師巫邪術之家。皆痛懲之。嘗與僚佐聽政。有縱妻犯姦者。公曰。以妻爲娼。恥莫甚焉。汝何忍犯之。曰。非不知恥。欲得錢養生耳。公笑謂左右曰。彼因愛錢。遂至于此。貪冒者何異斯人耶。故一時僚佐多廉介謹飭之士。按部往往不越宿去。嘉興七縣錢糧。視他郡爲浩繁。糧長人役。有多收斛面尖頭事。發。公歎曰。是弊自上始。設無所規取。下之人敢縱放如此。于是先革管糧官吏之賂遺。後治其罪。冬夏之服。惟紗緞一襲。然必用本等繡補。參謁上官。無異平時。雖朝覲謁見。必服之。或曰。不可。公曰。朝廷制服也。舍此安服耶。嘗道知其人。亦不之訝。郡亢旱。去冠帶。徒跣禱城隍。引罪自訟。少頃雲起。大雨如注。其秋大熟。一夕獄逸重囚七人。公禱于城隍。夢神告囚所匿處。搜之。果得其三。其四亦爲近城人所獲。公之行孚神明如此。公能察識天文。凡言水旱陰晴輒驗。秋將納稼。天極晴霽。人多緩糶事。以俟堅好。公屬耆老謂之曰。大雨不日至矣。宜急收刈。言之既數。人不爲意。既而大雨浹旬。禾悉生芽。民皆神之。郡東門外民居稠密。數有火患。公置更樓于宣公橋。榜其額曰。春波遠覽。寓以水濟火之意。災息者三十年。有不喻公意者。易其匾。災復見如故。郡民多以爭田訟于公。公諭之曰。今土星在南。故騰貴。後二十年莫爭矣。後果以賦役煩而地土賤。郡以嘉禾得名。公在郡嘉禾盛生。每莖離根二節。閒又生一莖。秀二穗。或三節。閒又生一莖。秀三穗。或四莖。五莖。秀四五穗。經歷司蓮缸栽稻二本。亦如之。郡民獻于公。謂德政之徵。公謝曰。郡志古有是瑞。此氣運循環耳。人益重公謙德云。公在郡三四載。積粟數百萬。不

惟可賑本郡。兼可移賑浙以東。自郡守擢爲按察使。至浙卽榜示曰。訪得鎮守府三察院。及布按二司。及
各道書手某某等。舞法害人。自本職到任之後。許自新。否則問遣如法。越數日。尙有依戀鎮守府者。公往
縛之。鎮守亦聽公之執法也。所屬官員貪殘害民。公素知之。旣至。卽召與之約曰。閭閻兇頑。一鄉害之。士
大夫皆知爲民除之。不知己身爲萬民之害。今與所屬約誓。欲除民害。先除己害。二害咸除。一方乃甯。有
常積倉官十餘員。以虧糧監比歲久。至鬻子女以償者。公憫之。莫喻其故。適倉官送月俸。至命量之。正數
外尙餘四五斗。且曰。此常規耳。公因悟曰。前倉虧糧之故。出而審之。得其實。欲奏聞。衆懼請以公。公曰。俸
者民膏脂也。食而盡職。尙有天殃。況正數之外。乃其子女所易食其餘。是食其子女也。衆因願捐俸設法
補之。以釋其罪。成化庚子鄉試。公監試。得二上卷。卽具服焚香再拜。同事者語之。答曰。人臣以得士爲功。
二子皆奇才也。他日當大魁天下。吾爲朝廷得人賀耳。及開卷。乃王華、李閔也。復曰。儒士王華當作首。但
非由學校作養。無以激勸後人。因以李閔爲首。後華閔竝作狀元。衆服其知人。太夫人終制。起陞右僉都
御史。整飭薊州。巡撫順天。撫臨里水灣石門寨黃土嶺等處。關塞皆塊石乾砌。或道路茅塞。或倒塌穢汚。
或用槍架作營門。仰而嘆曰。如保障何。卽命各將官加倍修砌。簡卒守瞭。一時關塞壯麗。士卒精強。公謂
天壽山守備廖太監等曰。慶成經筵。皇上至尊無對。中坐文武百官。東西序爵而坐。其餘臣民宴客之禮。
皆賓上主下。或賓東主西。近來內臣妄自尊大。在上中坐。令客東西坐。僭行君臣燕饗之禮。無乃不可乎。
廖太監等雖勢傾中外。聞僭行燕饗等語。竟莫能辨。卒從公議。成化乙巳正旦。星變。有聲如雷。二月地震。

二次費縣地陷湧水泰山搖響上震恐下詔求言。公上疏。歷指內臣及文武臣大肆貪殘。民心嗟怨。天出災異。又曰。宵人在位。播惡于衆。官民供給。日費萬錢。天人共怒。王法難容。又曰。乞查舊例。取四鎮守等官。又曰。臣效王珪確論。如鎮守必賢。如懷恩者任之。如巡撫漕運必賢。如周忱李乘王竑者任之。布政憲使必賢。如王恕軒輅者任之。知府必賢。如崔恭王宇者任之。下此斗筲。不堪任使。疏上不報。公上進退內外官員疏。衝突內豎。未幾假疏濬河源事。左遷雲南按察司副使。親舊多爲公危者。公慨然曰。韓魏公有言。天下事見得理是便作。勿計生死禍福。吾何憾耶。卽日就道。至雲南榜示曰。按察專以按察奸弊爲職。今本職按察得奸弊三事。一事二司官新任。吹毛求疵。凌屬土官軍職。要索銀兩。多者千餘金。一事二司官出巡。隨役索要有司常例。閒有好官不從。吏典人等撥置本官。輒將好官辱罵凌辱。一事二司官私役銀銅錫木漆竹皮畫鉞銀等匠。鉞銀馬鞞妝奩。及置造百般器物。歲無虛日。有司效尤。一體置造。或朝覲官員。踵訛索取。勞民傷財。固有止極。榜出。觀者歎其痛切。時適崗獠猖獗。官兵數萬臨之。不能下。公毅然往諭之。署其旗曰。雲南副使楊繼宗。入其穴。衆皆羅拜曰。聞公名久矣。今至此。某等再生之日也。因語其生亂之故。奏開區處。衆帖然聽。擢湖廣按察使。初下車。汲清水數十桶。洗刷堂序者三日。滌去貪污之氣。後乃升堂。卽出榜示曰。按察不明。賊官相慶。又曰。以迎送爲謹慎。餽問爲才能。又曰。屬官放肆。貪賊至積萬餘兩。而貪心不足。縱惡毆死人。至十餘命。酷暴猶不少減。又曰。將風憲官知善不舉。見惡不挈。發邊瘴地而安置之。一時官吏悚慄。尋陞左僉都巡撫雲南。三司皆舊僚友。視篆之日。行公禮畢。出位降階。更拜二

拜曰。明日幸相諒。衆不解其意。次日疏貪酷不職者八人奏聞。俱落職爲民。士官襲職鎮守三司。指要保勘銀。承行吏典五倍之。齋本人十倍之。相沿爲例。公以奏聞。略曰。臣至雲南。纔知此事。若臣不至雲南。終身不知。臣年老多疾。臣若不言。恐臣死後。無人肯言。此弊終不能革。乞將前項官員俱發充軍。朝野傳誦。以爲盡言。

余向于名山藏。吾學編。讀陽城楊公傳。清風介節。古循吏中。應推冠冕。當世而有若人。庶幾旦暮遇之。及康熙丙子之冬。補守嘉興。卽公所治郡也。距今二百餘年。邦人頌公遺澤。猶嘖嘖不置口。余瞻拜祠堂。肅然起敬。因手錄其政績一編。公暇輒爲展閱。自慚拙陋。公之行事。未能倣摹萬一。惟執鞭欣慕之。思或堪相質耳。三韓黃家遊書。